

6  
FR. VINCENTII FASSINII

ORDIN. PRAEDIC.

IN PISANO ATHENAEO

SACRARUM LITTERARUM PUB. PROF.

REGIAEQUE CORTONENSIS ACADEMIAE SODALIS

DE ALEXANDRO MAGNO

INGRESSO HIEROSOLYMA

ANTEQUAM SE AD HAMMONIS ORACULUM TRANSFERRET

EXERCITATIO

IN QUA

FLAVII IOSEPHI


NARRATIO DEFENDITUR.

ACCEDIT ALTERA

DE EIUSDEM REGIS IMPERII DIVISIONE

AD CAPUT I. LIBRI I.

MACHABAEORUM.



FLORENTIAE MDCCCLXXX.

APUD CAJETANUM CAMBIAGI TYPOGRAPHUM REG. CE. D.

SUPERIORUM PERMISSU.



# PETRO LEOPOLDO

REGIO PRINCIPI

HUNGARIAE ET BOHEMIAE

ARCHIDUCI AUSTRIAE

MAGNO DUCI ETRURIAE

&c. &c. &c.

AUCTOR OBSEQUENTISSIMUS.

**D**Uobus iam a me, ingenti mercede Summi Numinis munere, sub Augustis Auspiciis Tuis, PETRE LEOPOLDE MAGNE DUX, editis in vulgus

a

Apo.

*Apologeticis Sacrorum Codicum libris, modo tertius accedit, quem quominus Celsitudine Tua non indignum prorsus putarem, cum singularis illa Clementia fecit, quā priores complexus es, tum vero argumenta quae in hoc eodem edisseruntur. Nempe quum Exercitationes duas de singularibus aliquot Alexandri M. Macedonum Regis gestis, ac praesertim de eiusdem ingressu Hierosolyma, a Flavio Iosepho descripto, factaque ab eo, dum adhuc viveret, Imperii divisione ad Scriptoris Libri I. Machabaici Vindicias, vulgare instituissem, facile mihi persuasi, Te ut litterarum, bonarumque omnium Artium vere magnum statorem, ac vindicem, ita priscae  
etiam*

etiam Historiae scientissimum, novum  
hoc mearum contentionum specimen  
probaturum. Quod si pro voto mihi  
contigisse comperero, erit sane cur au-  
dere maiora; Tuaque etiam imposte-  
rum favente Clementia, non infelici-  
ter fortasse praestare possim.



## FACULTAS

REVERENDISS. P. MAGISTRI ORD. PRAED.

Nos Fr. Balthasar de Quinones S. Theologiae Professor, ac Universi Ord. FF. Praedicatorum humilis Magister Generalis & Servus.

**H**Arum serie nostrique Auctoritate officii licentiam concedimus, quantum in nobis est, Typis edendi opus, cui titulus: *F. Vincentii Fassini O. P. in Pisano Athenaeo Sacram Litterarum Pub. Prof. De Alexandro M. ingresso Hierosolyma antequam se ad Himmonis Oraculum transferret Exercitatio, in qua Flavii Iosephi narratio defenditur. Accedit Altera de eiusdem Regis Imperii Divisione ad Cap. I. Lib. I. Machabaeorum, dummodo a duobus Ordinis nostri S. Theologiae Professoribus probetur, & servantur caetera de iure servanda. In nomine Patris & Filii & Spiritus Sancti Amen. In quorum fidem &c. Dar. Romae in Conventu nostro S. Mariae Iupra Minervam die 20. Aprilis Ann. 1780.*

Fr. Balthasar de Quinones	} <i>Registr. Pag. 19.</i>
Magister Ordinis	
	} F. Vincentius M. Bertucci

CEN-

## C E N S U R A

## THEOLOGORUM ORDINIS PRAEDIGATORUM

**I**ubente Reverendissimo Patre Fratre Balthasare de Quinones, Magistro Generali totius nostri Ord. Praedicatorum diligenter accurateque perlegimus Clarissimi P. Fr. Vincentii Fassinii in Pisano Athenaeo Sacrarum Litterarum Publici Professoris Exercitationes duas, in quarum prima Flavii Iosephi de *Alexandro M. ingresso Hierosolyma antequam se ad Hammonis Oraculum transferret*, in altera divinitus afflati Scriptoris Libri I. Machabaeorum *De eiusdem Regis imperii divisione* narratio magna eruditionis copia vindicatur; cumque in his perlegendis nihil nobis occurrerit, quod vel ab orthodoxae Religionis doctrina sit alienum, vel cum recta morum institutione pugnet, eas in vulgus Litterariae Reipublicae commodo edi posse censuimus. Romae in Coenobio S. M. supra Minervam VI. Idus Maias An. MDCCLXXX.

Fr. Thomas M. Soldatus S. Theolog. Baccalaureus  
& in Collegio Germanico - Hungarico Professor.  
Fr. Thomas M. Mancini S. Theologiae Professor.



## SYNOPSIS

## EXERCITATIONIS I.

**A**lexandrum M. ingressum esse Hierosolyma testatur Flavius Iosephus cum in Antiquitatibus Iudaicis, II. tum in Libris contra Apionem. III. Eidemque consentiunt Talmudici, & alii Iudaici Scriptores; IV. nec non plerique Patrum, imprimisque Origenes & Cyprianus, V. Iulius Africanus, VI. Eusebius Caesariensis, VII. Auctor antiquus Commentariorum in Daniele, VIII. Sulpicius Severus. IX. Nec non Graecorum mediae aetatis Historici Georgius Syncellus, X. Georgius Cedrenus, XI. Ioannes Zonaras. XII. Michaël Glycas, XIII. Et alii viri doctissimi sequioris temporis. XIV. Ac licet Flavianam narrationem improbarint Vandalius, Moylius, & nuper Anonymus Gallus; XV. Plura tamen sunt quae illam tueantur, refellantque eorundem Exceptiones, atque illam praesertim, quae ex silentio ducitur Scriptoris Libri I. Machabaeorum; XVI. tum profanorum Historicorum, XVII. Diodori Siculi, XVIII. Plutarchi XIX. Arriani, XX. Q. Curtii, XXI. & Iustini. XXII. Idem dicendum de exceptionibus reliquis ex Iaddi summi Iudaeorum Pontificis aetate depromptis.

*promptis ; XXIII. quam recte a Iosepho ad Alexandri M. tempora protraham fuisse monstratur . XXIV. Nec minimum impredientibus hanc Chronotaxin, quae in Nehemiae Libro cum de eodem Iaddo, XXV. tum de Sanaballeta, Samariae Satrapa leguntur . XXVI. Quae autem insignis Hebraeorum Historicus de suorum coniugis cum foeminis alienigenis refert , XXVII. deque tributis ab Alexandro petitis , XXVIII. & Templo in monte Garizin a Samaritanis extructo, cum Sacra Historia consonare videntur . XXIX. Exponitur deinde ratio itineris Alexandri Hierosolyma, XXX. & de eiusdem, ac Iaddi insomniis differitur ; XXXI. Explicaturque quomodo potuerit Macedonum Rex habere in comitatu Chaldaeos, quos nondum vicerat, & Iudaeorum Pontificem venerari ; XXXII. Dei nomen in Cidari Pontificia insculptum intelligere, XXXIII. eidemque sacrificium offerre in Templo Hierosolymitano . XXXIV. Postremo Danielis Prophetiam de Persarum Imperio a Graeco homine destruendo eidem fuisse ostensam, & Iudaeos sub eodem stipendia meruisse demonstratur .*

## S Y N O P S I S

## EXERCITATIONIS II.

I. **A**lexandrum M. Regnum, eum adhuc viveret, inter suos divisisse, fidem facit Auctor Libri I. Machabaeorum; cui licet ad-versari videantur rerum Alexandri Scriptores, II. iniuria tamen hac de re Protestantes nobis litem intendunt, quum plerique ex iis eruditissimi Machabaici Scriptoris narrationem ac fidem caeteris Graecorum, Latinorumque narrationibus anteponendam velint. III. Atque id eo vel magis probandum est, quod non desint Scriptores, qui conditum fuisse ab Alexandro Testamentum referant; IV. Et ea quae Graeci, Latini-que Historici de postremo Alexandri morbo litteris prodiderunt, plane persuadeant Macedonum Regem aliqua ratione Imperium inter Aulæ, Militiæque suæ præcipuos Duces divisisse: V. Non ut cum summa potestate, sed uti Satrapæ illud regerent. VI. Refelluntur caetera, quæ innoxii Protestantes aliqui Machabaicum Historicum rerum Alexandri ignarum fuisse frustra nituntur ostendere.



DE ALEXANDRO MAGNO  
INGRESSO HIEROSOLYMA  
ANTEQUAM SE AD HAMMONIS ORACULUM TRANSFERRET  
EXERCITATIO  
*I N Q U A*  
FLAVII IOSEPHI  
NARRATIO DEFENDITUR  
*AD VIRUM CL.*  
IOANNEM MARIAM  
LAMPREDIUM  
IN PISANA ACADEMIA ANTECESSOREM

---

**P**Rodit iam modo in vulgus, Lampredi doctissime, Exercitatio illa, quam me editurum anno superiori Tibi fere sponderam. Et delituisse ea quidem etiamnum, nisi auctoritas tua, iudiciumque sane gravissimum, in quo non semel me conquievissse libens memini, tum vero meum erga te studium, & anior, tandem evicissent, ut prodiret in lucem, quam haud ignara discriminis averfabatur. In ea nimirum ostendendum suscepi adversus An-

A

to-

tonium Vandalium, Moylium, & alios, Alexandrum M. Macedonum Regem, antequam se se in Aegyptum, indeque ad Iammonis Oraculum transferret, adiisse Hierosolyma, ita uti narrat Flavius Iosephus, ibique splendidissimo exceptum apparatu, legesque, ac caeremonias Hebraeorum edoctum, sacrificium fecisse. Id vero quantum difficultatis prae se ferat, tute ipse vides, qui apprime intelligis esse difficillimum ea aggredi disputando suadere aliis, quae cum Eruditorum aliquot haud infimi subselei, tum vero praedudicatae propterea multorum opinioni, sententiaeque contradicant. Quam ob rem ne in maiorem quam vellem, aut sustinere me posse putarem, reprehensionem incurrerem, opinando potius, quam asserendo, pauca haec protuli, plus certe ad declarandam mei erga te voluntatem, quam ad eruditionis, doctrinaeque laudem adsequendam valitura.

I. Itaque ingressum Alexandri M. Hierosolyma pluribus prosequitur Flavius Iosephus (a), qui tamen initio quaedam de suorum cum alienigenis foeminis coniugiis praemittit, heic quoque oculis subiicienda, ut facilius intelligantur quae eidem laudati Critici op-

---

(a) Lib. XI. *Antiquit. Iud. cap. 8.*

opponunt. Post Iohannis vero obitum, inquit (a), Iaddus eius filius Sacerdotium accepit. Erat autem & huic frater Manasses nomine, cui Sanaballetes ab ultimo Rege Dario missus in samariam Satrapa, natione Cuthaeus (ex qua natione orti sunt etiam Samaritani) videns praeclaram urbem esse Hierosolyma, eiusque reges Assyriis, & Coelef-Syriae incolis multa negotia facessisse, libenter filiam suam, Nicaso vocatam, in matrimonium dedit, ratus hoc connubium sibi fore pignus ad totius Iudaeorum gentis conciliandam benevolentiam. Post haec turbas propter hoc, aliaque similia connubia exortas ita commemorat: (b) iam vero Senatores Hierosolymitani, aegre ferentes Iaddi Pontificis fratrem, qui uxorem habebat externi generis, consortem esse Sacerdotii, ab eo dissidebant; iudicabant enim eius matrimonium gradum esse iis, qui in re uxoria peccare vellent, idque initium fore ineundae societatis cum exteris. Iam vero superioris captivitatis, & malorum causam eis fuisse, quod quidam in connubiis peccavissent & peregrinas uxores duxissent. Itaque inebant Manassē, ut aut divortium cum uxore faceret, aut ad aram ne accederet.

A 2

Igi-

(a) Lib. cit. cap. 7.

(b) Lib. cit. cap. 8.

*Ignitur cum pontifex pariter ac populus indigno  
hoc ferret, & fratrem ab ara arceret, adit  
Manasses socerum Sanaballetem, & se quidem  
amare dicebat filiam eius Nicaso, sic tamen  
ut Sacerdotali honore ( qui in gente sit maxi-  
mus, & in eadem familia maneat ) privari  
propter eam haud velit. Ad haec cum Sana-  
balletes promississet, non solum sacerdotium ei  
se servaturum, verum etiam pontificiam pote-  
statem, & honorem praestiturum, & omnium  
quibus ipse praeerat, locorum Praesidem esse-  
cturum, modo filiam suam retinere velit uxorem,  
dixissetque Templum se aedificaturum  
Hierosolymitani simile in monte Garizin, qui  
in Samaria est caeterorum montium altissimus,  
idque de Darii Regis sententia facturum; his  
promissis elatus Manasses haesit Sanaballeti,  
pontificatum se Darii munere obtenturum spe-  
rans; nam & Sanaballetes iam senior erat.  
Et quia multi Sacerdotes, & Israëlitae erant  
eiusmodi coniugiis implicati, agitabant non me-  
diocres turbae Hierosolymitanos. Desiciebant  
enim omnes ad Manassem, Sanaballeti eis pec-  
uniam suppeditante, & terram ad agricola-  
tionem, & habitationem dividente, omnibusque  
modis genero gratificante. His addit ut Darium  
Alexander vicerit, Iudaeosque ad deditionem,  
& tributa pendenda frustra excitavit: Eo au-  
tem*



tem tempore Darius cum intellexisset Alexandrum traiecto Hellesponto, superatisque ipsius Praefectis apud Granicum pergere ulterius, equitum, peditumque exercitum coegit, eo consilio, ut Macedonibus obviam iret, priusquam totam pervasissent Asiam. Cum itaque Euphratem flumen copias traduxisset, Taurumque Ciliciae montem superasset, hostes intra Ciliciae fines opperiebatur, ut ibi cum eis praelio dimicaret. Sanaballetes autem Darii descensu laetatus, Manassi dicebat sese promissa praestitutum simul ac Darius victis hostibus rediisset. Erat enim persuasum non ei solum, sed etiam omnibus qui erant in Asia, ne congressuros quidem cum Persis Macedonas propter multitudinem. Verum longe aliter res accidit, quam exspectabant. Nam Rex cum Macedonibus congressus, victus est, & magna exercitus parte amissa, & capta eius matre, & uxore; & liberis, fugit in Persas. Alexander vero in Syriam profectus capit Damascum, & Sidone potitus-Tyrum obsidet: missisque ad Iudaeorum pontificem literis postulat, ut sibi auxilium mittat, & exercitui commeatum suppeditet, & quaecumque antea Dario stipendia pendebat, ei solvat, & Macedonum sequatur amicitiam; fore enim ut eius rei non poeniteat. Cum autem Pontifex, tabellariis respondisset, se Dario cum iureiurando

rando promississe, adversus eum arma non latu-  
rum, idque numquam superflite Dario violatu-  
rum dixisset; his auditis ira commotus erat  
Alexander, & Tyrum quidem relinquere,  
quae iamiam capienda foret, non statuit, sed  
minatus est sese, ea subacta, in Iudaeorum Pon-  
tificem exercitum moturum, & per eum omni-  
bus ostensurum, quibusnam iusiurandum ser-  
vare debeant. Inde acrius obsidionem urgens,  
Tyrum expugnat: & constitutis in ea rebus  
contra Gazaeorum urbem proficiscitur, atque  
Gazam, & praefidiis in ea Praefectum nomine  
Babemesem obsidet. Sanaballetis postea consi-  
liorum exitum, atque ut Iaddus sese divino  
monitu ad Alexandrum excipiendum compa-  
rarit, sic enarrat: Iam vero Sanaballetes, ra-  
tus idoneum se tempus naclum esse ad id quod  
insituerat, a Dario defecit, sumtisque octo sub-  
ditorum suorum millibus ad Alexandrum se con-  
tulit: & naclis eum Tyri oppugnationem ag-  
gredientem, dicebat ei sese quae loca teneret  
traditurum, & Dominum pro Dario libenter  
habiturum. Cumque eum Alexander laetus  
admisisset, Sanaballetes sumta iam fiducia, de  
instituto suo sermonem iniecit, demonstrans ge-  
nerum se habere Manassem, Iaddi Iudaeorum  
Pontificis fratrem, multosque alios eiusdem gen-  
tis homines ei adesse, qui iam velint in sua  
di-

ditione Fanum construere. Et id quidem Regi utile esse, in duo dividi Iudaeorum vires, ne, siquando consentiens, & coniuncta gens novi quid moliretur, Regibus negotium facesseret, sicut antea fecisset Assyriorum Principibus. Igitur permittente Alexandro Sanaballetes, omni adhibita diligentia, Templum aedificavit, & Manassem sacerdotem constituit, arbitratus id decus fore maximum filiae suae natis. Deinde post septem menses in obsidione Tyri consumptos, & in Gaza duos, ad Hierosolymitanam Urbem ascendere contendit. Ast hoc audito Pontifex Iaddus in angustia erat, atque metu, sollicitus quo nam pacto Macedonibus obviam iret, irato Rege propter superiorem contumaciam. Itaque indictis populo supplicationibus, & cum eis rem divinam faciens, orat ut gentem tueri, & ab impendentibus periculis liberare velit. Cum autem nocte post sacrificium obdormiret, monuit eum in somniis Deus, ut bono esset animo, utque coronata urbe portas aperirent, & alii in albis vestibus, ipse vero cum sacerdotibus ornatus ad legis praescriptum obviam irent, nihil mali sibi metuentes providente Deo. Igitur excitatus ex somno, & ipse magnopere gaudebat, & indicato cunctis eo oraculo, factisque omnibus, quae ei in somnis mandata fuerant, Regis adventum praestolabatur. Tandem Iudaeo-

daeorum occursum, Regisque ingressum in urbem, ac templum, & caetera ita Flavius describit: *Atque ubi eum non procul abesse ab urbe intellexit, prodit una cum sacerdotibus & civili turba, venerabili & diverso ab aliis gentibus occursum, in quemdam locum, qui Sapha dicitur. Hoc autem nomen si Graece interpretemur, speculam significat: inde enim & Hierosolyma & Templum conspiciebantur. Cumque Phoenices & Chaldaei, qui Regem sequebantur, fore putarent (quae verisimile erat regem prae iracundia illis permissurum esse) ut urbem diriperent, & Pontificem excarnificarent, accidit, ut res contra se haberent. Alexander enim procul adhuc conspiciatus multitudinem in albis vestibus & sacerdotes praecedentes in byssinis tunicis, & Pontificem in hyacinthina veste, & auro distincta, atque liaram in capite gerentem, & auream in eo laminam, in qua Dei nomen inscriptum erat; solus accessit & nomen veneratus est, priorque Pontificem salutavit. Iudaeis autem una voce omnibus Alexandrum salutantibus, & in orbem cingentibus, Reges quidem Syriae, reliquique obstupuerunt, & Regem mentis impotem sunt suspicati. Parmenione vero solum eum aggresso, & percontato quid factum sit ut omnibus eum adorantibus, ipse Iudaeorum Pontificem adorarit „ Non hunc*

„ hunc , *inquit* , adoravi , sed Deum , cuius  
 „ ille summo sacerdotio decoratus est. Hunc  
 „ enim secundum quietem vidi in hoc habitu,  
 „ cum essem in Dio in Macedonia ; ac cogi-  
 „ tantem me apud meipsum , quo nam pacto  
 „ potiri possem Asia , hortatus est ne cunctar-  
 „ rer , sed confidenter traicerem ; sese enim  
 „ exercitui meo praeiturum , mihiq[ue] Persa-  
 „ rum imperium traditurum . Itaque quum  
 „ alium nullum in tali veste viderim , & nunc  
 „ conspicatus hunc , & illius in quiete visi , &  
 „ cohortationis recordatus sim , puto me divi-  
 „ no missu facta expeditione , Dario superio-  
 „ rem fore , & Persarum potestatem abolitu-  
 „ rum , atque omnia quae mihi sunt in animo  
 „ successura „ *Haec loquutus ad Parmenionem ,*  
*dataque Pontifici dextera , sacerdotibus eum co-*  
*mitantibus in Urbem venit & ἀναβάντων ἐπὶ τὸ ἱερὸν*  
*ἦλθεν μὲν τῷ Θεῷ κατὰ τὴν τοῦ Ἀρχιερέως ὑπόδειξιν*  
 & in templum ascendit ac Deo ad sacerdotis  
 praescriptum sacrificavit ; ipsumque Pontificem  
 & sacerdotes magnifice honoravit . Ostensoque  
 ei Danielis libro , in quo fore significabatur , ut  
 Graecorum quidam Persarum imperium abo-  
 leret , ille se enim esse , qui significaretur existi-  
 mans , tunc quidem multitudinem dimisit : po-  
 stridie vero eius diei eos advocat , quaeque ipsi  
 velint dona postulare iubet . Pontifice autem pe-

sente, ut liceret patriis uti legibus, utque septimo quovis anno tributo essent immunes, omnia eis concessit. Cumque illi ab eo petissent, ut & eos, qui Babylone & in Media erant, Iudaeos legibus suis uti sineret, libenter promissi facturum quae ab eo postularent. Cum vero ad hoc diceret multitudini, si qui secum militare vellent, ea lege ut patrios mores tenerent, & secundum eos viverent, paratum esse eos secum ducere, multi lubenti animo in eam expeditionem dederunt nomina. Haecenus Iosephus, qui antequam hoc caput absolvat, quaedam de Samaritanis adiicit, qui quum Alexandrum enixe rogavissent, ut & eorum Templum inviscere non gravaretur, tum sibi ipsis quoque immunitatem a tributis quovis anno septimo pendendis largiretur, neutrum impetravere.

II. Memoravit eandem Historiam, quamquam paucis, Iosephus in libris contra Apionem (a) inquit: *Verum Alexander eis locum ad habitandum dedit, & par cum Macedonibus ins consecuti sunt. Sane si legisset Epistolas Alexandri Regis, & Ptolomaei Lagi, ac in successorum illius Aegypti Regum Rescripta incidisset, & columnam stentem Alexandriae & iura continentem, quae Caesar magnus Iudaeis*

---

(a) Lib. II. num. 4.

daeis concessit : haec, inquam, si certe quidem sciens contraria scribere ausus est, improbus erat : sin vero nihil horum novit, indoctus. .... Non enim propter inopiam habitatorum civitatis, quam studiose aedificabat, nostrorum aliquos illic congregavit ; sed omnes probitatis ergo, & fidei probe perspectos & exploratos habens, hoc praemium nostris tribuit „ nostram enim „ gentem honorabat, ut etiam de nobis dicit „ Hecataeus, quod propter probitatem, atque „ fidem, quam ei praebuere Iudaei, regionem „ Samaritidem ab omni tributo liberam, ab „ iis insuper teneri voluerit. „ Et infra (a). „ Nam Aegyptiis neque Regum quisquam videtur ius civitatis fuisse largitus : neque nunc quilibet Imperatorum. Nos autem Alexander quidem introduxit, Reges autem anxere, Romani vero semper custodire dignati sunt. Non erat enimvero necesse, ut pluribus hoc loci historiam describeret, quam in Archaeologia fuisse narraverat, aut in utroque Opere adductis testibus, eiusdem comprobaret veritatem, quum de re ageretur toti Iudaicae genti exploratissima : hoc satis habuit si privilegia, exemptionesque illi ab Alexandro concessas retulisset, quae fuerant nimirum Iaddi Pontificis

---

(a) L. cit. num. 6.

cum eo congressus Hierosolymis fructus praecipui.

III. Habet autem Iosephus secum sentientes Talmudicos in Codice *Ioma* (a) & in *Zemach David* (b), tum Auctorem *Commentarii Maioris* in Leviticum (c). In *Megillath Taanith*, seu *volumine de ieunio*, quod latinum fecit notisque illustravit Ioannes Meierus, cum singularia quaedam hoc de facto leguntur (d), tum quo anni tempore Alexander Hierosolymia accesserit, indicatur, Mense Casleu scilicet, qui fere cum Novembri coincidit; nam die 21. huius mensis festum egerunt, quia Alexandri favore de Samaritanis triumpharunt. Iidem Talmudici triplicem, Alexandro M. iudice, litem Iudaeis intentatam fuisse aiunt (e), primam ab Africanis, alteram ab Aegyptiis, tertiam ab Ismaëlitis, seu Arabibus Cethurae posteris. Africani ut posteri Chananæorum, qui sub Iosue tempora e terra Chanaan pulsi in Africam migraverant, haereditatem avitam repetebant; cuius rei monumentum etiam extitisse in inscriptione quadam Provinciae Tingi-

---

(a) Cap. 7.

(b) Ad A. 3448.

(c) Sect. 13.

(d) Cap. 9.

(e) In *Gemara Babylonia* ad Tit. Sanbedrin Capit. 11. fol. 91. Et in *Berejith Rabba* Parash 61. fol. 68.



gitanae tradit Procopius (a). Ex iure successionis in Abrahae bona, seu familiae eriscundae agebant Ismaëlitae, & Cethurae posterī. Aegyptiī demum sibi aurum, argentumque restitui postulabant, quod Hebraeis Aegypto discessuris maiores sui mutuo dederant. Cuius concertationis praeter Clementem Alexandrinum, Epiphanium, & Isidorum Pelusiotam, meminit quoque his antiquior Tertullianus ajens (b): *Age infelicissime Haeretice, te ipsum expostulo arbitrum: cognosce in utramque gentem prius, & ita de auctore praecepti iudicabis. Deposunt Aegyptiī de Hebraeis vasa aurea, & argentea. Contra Hebraei mutuas petitiones instituunt, allegantes sibi quoque eorumdem patrum nomine, ex eodem scripturae instrumento, mercedes restitui oportere illius operariae servitutis pro laterinis deductis, pro civitatibus, & villis aedificatis. Quid indicabis Optimi Dei elector? Hebraeos fraudem agnoscere debere, an Aegyptios compensationem? Nam & aiunt ita actum, & legatos utrinque, Aegyptiorum quidem repetentium vasa, Iudaeorum vero reposcentium operas suas, &c. Ut ut autem se habuerint hae disputationes coram Alexandro M. habitae, ab eoque in favorem Iudeo-*

---

(a) Lib. 2. *De Rebus Vandalicis.*

(b) Lib. 2. *contra Marc. cap. 20.*

daorum absolutae, si Talmudicis, & Rabbiniis aliis credimus, tamen haud obscure iisdem innuitur quam alte illorum animis opinio cum de ingressu Alexandri Hierosolyma, tum de sibi conlatis beneficiis infedisset. Idem dicimus de *Aera Contractuum*, iuxta quam Chirographa, Testamenta, libellos matrimoniales, & repudii, instrumentaque omnia publica ultra mille annos obsignavere, quamve institutam, receptamque fuisse post eiusdem Regis adventum Hierosolyma, habitumque, cum Iaddo Pontifice colloquium, statuunt iidem Talmudici in *Avoda Sara*, Auctor libri *Iuchasin* seu *Familiarum* (a), R. Salomo, Moses Aegyptius, & alii.

IV. Suffragantur quoque Iosepho, eiusque narrationem excipiunt nonnulli veteres Ecclesiae Patres, aliique Christiani Scriptores, quos iam ad dicendam pro eo causam praestat excitare. Origenes imprimis de gente Iudaica differens (b), quam Celsus aspernabatur, ita in rem nostram ait: *sed hanc gentem Deo probatam fuisse inde arguitur, quod etiam ii, qui sunt a fide alieni, summum Deum appellant Hebraeorum Deum; quodque, quamvis parvo numero supersuerint, reliquiae tamen divina potestate servatae fuerint incolumes, ita ut nihil ab Alexandro Macedo-*  
*ne*

---

(a) fol. 15. & 90.

(b) Lib. V. C. *Celsus* num. 50.

ne passi fuerint, tametsi propter foedera quaedam, & iuramenta, contra Darium arma capere recusaverint. Quin aiunt summum Iudaeorum Pontificem Sacerdotali veste indutum ab illo Alexandro adoratum fuisse, dixisque Alexandrum sibi per somnum visum esse quempiam eadem illa veste ornatum, qui ipsi praedixerat, se totam Asiam armis esse subacturum. Nos igitur Christiani affirmamus Iudaeos prae caeteris Deo placuisse, & fuisse probatos. Nemo etiam in his Cypriani (a) Alexandri cum Iad-do congressum non agnoscat: Hoc ita Alexander M. insigni volumine ad matrem suam scribit metu suae potestatis proditum sibi de Diis hominibus a Sacerdote secretum, quod maiorum, & regum memoria servata sit, inde colendi, & sacrificandi ritus inoleverit.

V. Origeni concinit Iulius Africanus in fragmento Commentariorum in Daniele, quod Eusebius (b), et Hieronymus (c) exscribunt; percensitis enim aliquot summis Hebraeorum Sacerdotibus ita prosequitur: *post. quem Iaddus, cuius aetate Alexander Rex Macedonum condidit Alexandriam, ut Iosephus in An-*

---

(a) Lib. de Idol. Vanit. Quaedam etiam habet Epiphanius, quae huc spectant, in haeresi Ebionitarum.

(b) Lib. 8. cap. 1. Praeparat. Evang.

(c) Cap. IX. Comment. in Daniele.

*Antiquitatum libris loquitur, venitque Hierosolyma, & victimas in Templo immolavit.*

VI. Eusebius quoque Caesariensis in Chronico ait (a) primo: *Alexander adversus Illyricos, & Thracas feliciter dimicans, subversis Thebis, in Persas arma corripuit, & apud Granicum flumen Regis ducibus oppressis Urbem Sardeis cepit.* Et paullo post: *Alexander capta Tyro, Indacem invadit, a qua favorabiliter exceptus, Deo victimas immolavit, & Pontificem Templi bonoribus plurimis prosequitur, Andromacho locorum Custode dimisso, quem postea Samaritani interficiunt: ob quae ab Aegypto reversus Alexander magnis eos suppliciis affecit, & Urbem eorum captam Macedonibus ad habitandum tradidit.* Haec non a solo Flavio Iosepho, ut visum Vallartio, Eusebium accepisse duo probant; & primum quidem quia Iosephus non post Tyrum, sed post Gazam captam, Hierosolyma infenso animo properasse Alexandrum narrat; alterum autem, quia idem Iosephus nihil habet de Andromacho, deque suppliciis, quibus obnoxii Samaritae fuere eiusdem interemptores. Atqui unde haec deprompserit Eusebius; an ex Iusto Tiberiensi, quem in Prologo una cum Iosepho laudat, an

ex

---

(a) Num. MDCLXXXIII.

ex alio quopiam rerum Gentis Iudaicae Antiquo Scriptore, ut censet Hieronymus de Prato (a), non satis scio: hoc habeo compertum, recte a doctissimo Caesariensi Antistite constitutum fuisse (b) res Hebraeorum scilicet ab Hebraeis scriptoribus esse repetendas; *Nec enim aliunde opinor, aiebat, quam ex propriis eorum quoque fontibus res Hebraeorum hauriendae sunt, cum Aegyptiacas ab Aegyptiis, & a Phoenicibus Phoenicias petierimus, Graecasque similiter ab iis, qui nominis apud Graecos celebritate floruerunt, adeoque a philosophis, non autem ab iis, qui in philosophia hospites, ac peregrini essent, quae ad philosophiae rationes, ac decreta pertinebant. Quos tu vero iustius de Medicinae praeceptis quam Artis illius peritos consulas? Eodem plane iure statuo res Hebraeorum non aliis, quam Hebraeorum ex litteris esse repetendas.*

VII. Auctor Commentarii, sive interpretationis in *Danielem*, qui extat inter Opera S. Ioannis Chrysostomi (c), eius de se perlegisse prophetiam cum Hierosolymitanum templum adiisset, his verbis testatur: *Et vide quae inter Darium, & Macedones gesta sunt. Quam*  
 C  
 ob

(a) *Observat.* in Sulpicium Severum pag. 540. & seq.

(b) Lib. 7. cap. 8. *Præparat. Evang.*

(c) Tom. VII. edit. Montfauconii.

ob causam haec ? propter Iudaeos . Ideo & Alexander adoravit Templum, ut aiunt, cum hunc Danielis librum inspexisset : & Graeci vim praedictionum ipsius admirati sunt .

VIII. Denique Sulpicius Severus sic paucis totam historiam complectitur (a) : *Adversus Darium Alexander Macedo acie conflixit . Eo victo, Persis imperium ademptum, quod ab initio Cyri steterat annos ducentos & quinquaginta . Alexander victor fere omnium gentium, adiisse Hierosolymae Templum dicitur, ac dona intulisse : edixitque per omne imperium, quod sui iuris effecerat, ut Iudaeis ibidem degentibus liberum esset in patriam reverti .*

IX. Exscriptis haec tenus Patrum testimoniis nonnulla alia minime certe contemnenda, Graecorum Medii aevi eruditorum scriptorum libet adiicere, Georgii cum primis Syncelli ita scribentis (b) : *Alexander Illyricos, & Thraces cepit : Thebas subvertit : Darii Duces ad Granicum Lydiae flumen devicit : Sardes occupavit : Tyrum obsedit : Iudaea recepta, Iaddum Pontificem divinis honoribus prosequutus est, & caesis victimis Deum coluit, cuius munere regendum orbem se accepisse praedicavit : Iudaeae, vicinisque locis curatorem dedit Andromachum, quo*

(a) Hist. Lib. II. cap. 17.

(b) Chronograph. pag. 261. edit. Paris .

quo a Samariae civibus interfecto, poenas ex Aegypto reversus exegit : Alexander captam Samariam Macedonibus habitandam concessit. Quae licet ex Chronico Eusebii deprompta videantur, Scaliger tamen in notis ad idem Graecum Chronicon pag. 59. haec, & alia multa sine dubio desumpta esse affirmat a Dexippo, qui sub Valeriano, Gallieno, Claudio, & Aureliano pleraque ad Alexandrum pertinentia conscripsit, quae Syncellus quoque ad manus habuit. At quum idem hoc in loco nullam faciat Dexippi mentionem, tanti ponderis esse non potest sola Scaligeri auctoritas, ut illud fragmentum Dexippo indubie vindicetur (a).

X. Syncello iungimus Georgium Cedrenum, qui summos enumerans Iudaeorum Sacerdotes (b) cum ad Iaddum pervenit ait : Quo Pontificatum gerente Alexander Hierosolymis Deum adoravit. Etenim attonitus habitu Pontificis insolente, solus a curru descendit, nomenque Dei adoravit, Pontificemque maximum salutavit, ab eoque & universis Iudaeis vicissim est uno ore salutatus. Cum autem Syriae, ac cae-

C 2

teri

(a) Vide Fabricium Biblioth. Graecae Lib. V. cap. 5. seu Vol. VI. pag. 231., & Hieronymum de Prato loco cit. pag. 539. & seq.

(b) In Compend. Histor. pag. 194. edit. Paris.

teri Reges id factum mirarentur, atque mente Alexandrum ab alienatum putarent; ac praesertim Parmenio, exercitus ductor, miraretur quid rei esset, quod instar subditorum alicuius sese in terram rex prostravisset; respondit Alexander, hunc se honorem non pontifici dedidisse, verum Deo, quem is coleret, ac qui sibi auxilium contra hostes promississet. Quo enim tempore bellum contra Persas meditatus, eorum ingentem potentiam reformidasset, Deum sibi per insomnium specie huius Pontificis visum; bono esse animo iussisse, & alacriter institutum exsequi: nam suo nutu Persarum Regnum in ipso Alexandro desitutum. Itaque sibi Pontifice in hoc habitu conspecto, in memoriam insomnium redactum: seque haud abs re adorasse. Haec fatus, dextra summo Pontifici iniecta, comitantibus caeteris Sacerdotibus Hierosolyma intrauit. Ibi Sacrarum Literarum Doctores allato Danielis libro, eius vaticinium exposuerunt, quo praedicebatur fore, ut Macedo Persarum Regnum everteret. Qua ex re Alexander cum ingentem cepisset laetitiam, Templum Dei adiit, Deoque rem Sacram, praescribente omnia Pontifice Maximo fecit, eumque Pontificem, ac reliquos omnes Sacerdotes dignis muneribus donavit, Templum splendidis, ac magnificis donariis exornavit, atque ita demum contra Persas movit.



XI. Demus etiam locum Ioanni Zonarae cuius haec sunt verba (a): *Hic porro dum Tyrum obsidebat, per litteras a Pontifice Iudaeorum petiit, auxilia sibi mitti, & forum praebere exercitui, sibi que ea dari, quae pensitare Dario soliti essent. Cum autem Pontifex se iure iurando obstrictum esse Dario, ne arma contra illum ferret, dixisset, idque vivente illo violaturum negasset: Alexander iratus, se bello petiturum Hierosolyma conminatur: captaque Tyro contra Urbem profisciscitur. At Pontifex Ioadus ob regis iram anxius, Deum orat, ne populum destituat: quem Deus insomnis bono esse animo iubet: ac portis apertis, & urbe exornata ipsum cum Sacerdotibus solito habitu, populum candidis vestibus Regi obviam prodire. Facit ille ut iussus erat. Alexandro iam appropinquante, cum Sacerdotibus, & Urbana multitudine in locum quemdam prodit, nude & urbs, & templum conspiciebatur. Militibus autem opuantibus Regem iussurum Urbem dici, & Pontificem occidi: Alexander cum Sacerdotes, & populum, ut ante dictum est, ornatos vidisset, ac Pontificem hyacinthina & inaurata stola indutum, Cidari capiti imposita, & auream in eo laminam, cui Dei*

---

(a) *Annal. Lib. IV. num. 15. pag. 197. edit. Paris.*

nomen inscriptum erat, solus accessit, atque adoravit, Pontificemque salutavit. Eo facto cum caeteri omnes obstupuisent, Parmenio etiam rogare ausus est, cur Iudaeorum Pontificem adorasset? Cui respondit, se non illum, sed Deum, cuius ille Sacerdotio ornatus esset, adoresse: „ Nam hunc, inquit, in somnis vidi, dum adhuc parum a Macedonia recessissem, in hoc habitu. Is me de Asia subigenda cogitantem, hortabatur ne cunctarer: & promittebat se ipsum fore ducem exercitus, & Regnum Persarum mihi traditurum. Cum autem neminem adhuc, praeter istum modo tali habitu viderim: tum visionis nocturnae sum recordatus, tum Deo auctore bello moto me Darium superaturum confido, & regno Persarum potiturum „ *His dictis, & dextera Pontifici porrecta, Urbem est ingressus. Cumque in Templum ascendisset, Deo victimas ex praescripto Pontificis immolavit: ac Danielis libro viso, quo scriptum est Regnum Persicum a Graeco evertendum esse, laetatus, omnibus Iudaeorum postulatis annuit.*

XII. Postremo non praetereundus est Michaël Glycas rem ita gestam referens (a): *Philippo successit Alexander, qui quum adversus Persas*

---

a) P. II. Annal. pag. 141. edit. Paris.

*Perfas, atque Medos expeditionem suscepisset, a Iudaeis petiit, ut sibi copias auxiliares mitterent. Re non impetrata, quod illi dicerent, se Dario foedere coniunctos esse; quo contineretur, ne bellum adversus ipsum gererent, recta in eos cum exercitu contendit. Tum vero Pontifex maximus terroris causa vestem illam admirandam indutus, occurrit Alexandro: qui formidine perculsus, & ex equo delapsus, ad pedes Pontificis accidit. Ad hanc rem quum homines extranei magnopere obstupescerent, respondit Alexander: non se congenulando Sacerdotem venerari, sed cultum ab eo Deum, quem eiusmodi habitu conspexerit se contra Perfas instigantem, & animantem. Hanc ob causam Deo quoque rem Sacram Hierosolymis fecit. Itaque deinceps prudenter admodum, & solerter occupavit omnia.*

XIII. Haec Mediae aetatis Graecorum libuit testimonia recitare; etsi enim unum Iosephum fere videantur exscripsisse, nonnulla tamen singularia prae se ferunt, quae ab iis fuisse conficta haud ita facile quispiam iure dixerit. Longum autem opus, nec vero necessarium, susciperem, si ceteros viros doctissimos heic vellem percensere, qui Iosephi narrationem probare. Meminisse sat fuerit horum in censu numerari Carolum Sigonium, Ioannem Selde-

num.

num, Hadrianum Relandum, Iosephum Scalligerum, Iacobum Usserium, Dionysium Petavium, Natalem Alexandrum, Ioannem Nicolaum, Humfreddum, Prideauxium, aliosque permultos; quos etsi accuratissime Iosephi hac de re dicta haud expendisse contendas, fatcaris tamen necesse est nec illa suis indigna calculis, nec vero incredibilia iudicasse; hoc ipso scilicet quod eadem suis in scriptis unius Iosephi plerumque fide, ac testificatione contenti retulerunt. Plus nempe apud eos valuit unius perdocti, & antiqui Auctoris de rebus suis scribentis testimonium, quam silentium exterorum.

XIV. Flavianam tamen narrationem Iudaicis Fabulis, Rabbinorumque figmentis omnino similem esse censuit Antonius Vandalé in *dissertatione super Aristeā* (a) cui Ioannes Hudsonus adiungit (b) Thomam Wagstaffe in *Responsione* ad Lloydii Epistolam ad Scherlockium *de facto Iadduæ*. Post hos maiori animadversionum copia idem factum oppugnavit Moylius in Epistolis ad Humfreddum Prideauxium (c); ac demum nuperrime, cum

---

(a) Cap. X.

(b) In not. ad Lib. XI. cap. 8 *Antiquit. Iud.*

(c) Epist. IV. & VI. Extant ad calcem Gallicae Versionis *Hiistoriae Iudaeorum* edit. Amstelod. anni 1744.

cum Vandalii, tum Moylii recufis argumentis, Anonymus Gallus in Differtatione, in qua Veterum rerum Alexandri Scriptorum criticum examen instituit (a). Nec defuere alii, quibus recenti memoria aut suspecta, aut falsa prorsus visa est eadem Historia, imprimisque Voltærius, qui sæpe ob id Iosephum propterea laceravit. Sed hi quum aut Vandalium ac Moylium ferme exscripserint, aut nulla peculiaris sententiae suae momenta in medium attulerint, non est certe cur heic de eorundem nomine ac numero solliciti esse debeamus. Quare eorum numeratione praetermissa, ad ea potius refellenda, quae Iosepho opponuntur, praestabit accedere; nam id, quum a nemine hætenus, quem viderim, praestitum fuerit, operae pretium me esse facturum putavi si fecissem.

XV. Id vero ut ordine aliquo exequamur, exceptionem primo refutabimus, quae ex sacrorum profanorumque scriptorum silentio ducitur, tum perpetuum veluti ad exscripta Flavii Iosephi verba commentarium adhibebimus, ostendemusque nihil eius in narratione reperiri, quod eam aut prorsus esse incredibilem commonstret, aut aperte falsam persuadeat. Itaque validius telum, quod se in Iosephum

D

in-

---

(a) *Examen critique des Anciens Historiens d' Alexandre*. Paris 1775.

intorquere posse iudicent laudati Critici, ex silentio depromitur cum sacrorum tum profanorum scriptorum; aiunt scilicet fidem omnem superare eorum neminem tantae rei meminisse, non Scriptorem Machabaicum, non Diodorum Siculum, non Plutarchum, non Arrianum, non Iustinum, non Q. Curtium, non denique alios. Atqui, ut de silentio primum dicam utriusque Machabaeorum libri Auctorum, praeter rem atque iniuria prorsus hi Critici contendunt ab iis Alexandri accessum Hierosolyma commemorari debuisse, qui sibi tantum proposuerant nobilissima Mattathiae, filiorumque facinora, atque immanitatem Aegyptiorum, Syrorumque regum adversus Iudaeos fusa oratione describere. Hinc his in libris, quae Iudaica gens primum Syriae Regibus serviens, deinde excusso iugo sui iuris facta, quadraginta quinque circiter annorum lapsu & gessit, & sustinuit duo Auctores complexi sunt, initio ducto a postremis annis regni Seleuci Philopatoris, qui Templum per Heliodorum pollui iussit, usque ad postremos Antiochi Sidetis, sub quo per insidias Simon Machabaeus est interfectus. Ut autem ad haec enarranda viam sibi quodam modo pararet primi Machabaici Scriptor, e re sua, imo necessarium duxit ab Alexandro Magno exordiri, ex cuius imperii parti-

titione ii Reges prodierant, qui Iudaeos tantopere afflixerant, maxime dum collabentem Rempublicam sustinere adversus Antiochi impios conatus, atque finitimarum gentium impetus niterentur. Fecit vero id paucis adeo ac generalibus verbis, ut nil pressiori stilo scribi potuerit, nihilque forte iam sit in graecis, caeterisque Auctoribus quod probari possit, si omnia sint abiicienda, quae in Machabaica Synopsi non leguntur.

XVI. Iam ut ad profanos Auctores me conferam, antequam de singulis dicere incipiam, pauca liceat praemittere de peculiaribus Hebraeorum vivendi institutis, deque inde orta Veterum in illorum rebus inscitia: hoc enim patefacto, minus silentium mirabimur Historicorum qui Iosepho obiiciuntur. Sane Iudaica gens ex instituto suo ita fuit a reliquis gentibus discreta, maxime ante Alexandri expeditionem, ut Herodotus ne eius quidem nomen habuisse compertum videatur. Nullo illa se commercio, nulla affinitate cum iis consociari iugiter enixa est, qui viverent alieno more, & diversis ritibus ac religione uterentur. Piaculum etiam censebant extra Palaestinam vivere. Hinc teste Maimonide, scitum illorum vulgare fuit: qui peregre extra Terram Sanctam degit, velut syderum planetarumque cultorem habendum. Neque

fane erat quod eos excusaret, nisi fames flerilitasque, aut id genus alia ad solum vertendum coegissent. Atque inde est, quod nullibi legatur Iudaeos exsilio infantes animadvertisse, ne, dum sceleribus debitam poenam irrogarent, religionem proderent suam. Id saepe ethnici experti ab iis exposulaverunt. Querebatur Lysimachus (a) Mosem in mandatis dedisse Iudaeis ut nullum erga hominem benevoli essent, neque optima iis, sed pessima consilia darent. Quod, etsi a vero abhorret, vulgatam tamen de Iudaeis hominum reliquorum opinionem ostendit. Querebatur & Apollonius Molonis (b): *A Iudaeis non admitti, quicumque diversis de Deo opinionibus essent impliciti, nec consuetudinem iniri cum iis, qui aliam vivendi rationem essent amplexi.* Trogius quoque (c): *Caverunt ne cum peregrinis communicarent, quod, ex causa factum, paulatim in disciplinam, religionemque convertit.* Quam exposultationem tantum abest, ut sibi probrosam putarent Iudaei, ut sibi eam potius laudi ducerent; atque id praeceptum de Republica ab extraneorum contagio prohibenda, Platonem a Mose sumpsisse Iose-

---

(a) Apud Ioseph lib. 1. contra Ap. c. 34.

(b) Apud eumJ. lib. 11. contra Ap c. 37.

(c) Iustinus Lib. XXXVI. cap. 2.



sephus gloriatur (a). Quis ergo sibi persuadeat gentium aliarum oſores & contemptores Iudaeos tam facile iis faſtorum ſuorum penus referalle, quos vix allocutione etiam ſua, & commercio dignarentur? Quis credat Graecos caeteroſque aut Iudaicas res incorrupte mandare monumentis litterarum, aut ſummo eas cognoscendi deſiderio affici potuiſſe? Hinc illa de Iudaeis ſive portenta, ſive mendacia promanarunt a Iosepho confutata maxime in libris adverſus Apionem Grammaticum Alexandrinum perſcriptis, tum inde iaſtata ſaepius ſive odio gentis, ſive verae diſciplinæ ignoratione. Sed & idem Iosephus cauſas alias aperit, ob quas ethnici obſcuram admodum, incertamque de Iudaeis, horumque moribus, legibus, inſtitutis factiſque notitiam habuere. Inquirens enim cur Iudaea ſero valde ad Graecorum cognitionem pervenerit, aiebat (b): *Quod ad nos attinet, terram habitamus, quae neque mari vicina eſt, neque negotiationibus gaudemus, neque earum cauſſa nobis conſuetudo cum aliis gentibus eſt, ſed ſunt Urbes quidem noſtrae procul a mari ſitae: ipſi autem nos regionem bonam incolentes, hanc cum labore exercemus; maxime vero omnium liberis educandis ſtudentes & legum cuſto-*

---

(a) Lib. cit. C. Ap.

(b) Lib. I. C. Ap.

*stodiae, ut qui pietatem ad illas exactam opus totius vitae maxime necessarium fecerimus. Cum igitur ad ea, quae dicta sunt, accedat etiam vivendi ratio propria, nihil erat priscis temporibus, quod faceret nobis commercium Graecorum, sicut Aegyptiis mercimonia, ex rebus quae importarentur aut exportarentur ad alias gentes, & Phoenicibus oram maritimam accolentibus, cauponandi, & negotiandi studium ex amore pecuniae. Sed neque ad latrocinia sicut alii quidam, aut amplius habere desiderantes, bellum exercendo conversi sunt patres nostri, licet regio multis strenuorum virorum myriadibus abundaret. Quo factum est ut Phoenices negotiationis ergo ad Graecos navigantes statim agniti fuerint, & per illos Aegyptii, dein omnes a quibus ad Graecos onera perferebant, immensa maria transeuntes. Medi vero postea, atque Persae illis innotuerunt postquam Asiae imperarunt, Persaeque praecipue cum usque ad alteram continentem expeditiones fecissent; Thraces autem propter vicinitatem & Scythae ab iis qui in Pontum navigant cogniti sunt; atque in universum omnes ad mare vel orientale, vel hesperium habitantes, in eorum notitiam facilius venerunt, quibus in animo fuit aliquid historiae scribere. Eadem hinc fere Ethnici sive rerum Iudaicarum ignoratione, sive*  
gen-

gentis odio laboravere, etiam quum post Alexandrie expeditionem magnus Iudaeos inter & Graecos usus intercessit, ut qui non illius solum essent imperio subditi, sed in eius etiam exercitu stipendia facerent; ac praeterea dum statim post Alexandri obitum Ptolemeus Lagi occupatis Hierosolymis magnum Iudaeorum numerum in Aegyptum traduxit, & ius Alexandrinae civitatis iisdem tribuit. Hoc scilicet vel non multa illa testantur fabulis commentisque permixta, quae de Iudaeis Graeci, qui postea floruerunt, suis Historiis inseruerunt.

XVII. Quo certe numero non est eximendus Diodorus Siculus, etsi eundem *primum apud Graecos nugari desisse* scripserit (a) Plinius. Quantopere is Mosaicam, universamque demum Iudaeorum deformavit Historiam, Samuel Bochartus, Isaacus Vossius, & doctissimus olim Abrincanorum Episcopus Petrus Daniel Huetius praesertim palam fecere. Atque, ne a re, de qua agimus, longius discedamus ille idem Gallus Anonymus, qui Iosephum exagitat, hoc iudicium tulit de Libro XVII., in quo Diodorus res Alexandri persequitur (b): *le style en est lâche; les réflexions, quoique rares, n'en sont pas moins triviales. Diodore n'y*

---

(a) Praefat. ad Hist. Nat.

(b) Sect. Prem. pag. 32. & suiv.

indique jamais les sources où il a puisé, & n'appuie ce qu'il raconte d'aucune autorité ; enfin il manque souvent d'exactitude, & n'est point heureux dans l'arrangement des faits. La première partie de ce livre comprend tous les événemens qui précèdent la bataille de Gaugamèle ; elle, m'a paru travaillée avec plus de soin & supérieure à celle qui la suit : cet Ecrivain semble s'être fort négligé dans cette seconde partie, où il est difficile de bien saisir l'enchaînement des faits, & l'ordre des marches, & de diverses expéditions de l'Armée Macédonienne. La Chronologie y est entièrement bouleversée, & la lacune qu'on y trouve, est fort propre à augmenter l'obscurité qui naît de ce désordre. La guerre des Scythes, la révolte des Sogdiens, la mort de Clitus & celle de Callisthène, le mariage de Roxane, & le commencement de l'expédition des Indes, ne se lisent plus dans le texte de Diodore, & aucun Manuscrit n'a pu, jusqu'à présent, suppléer cette lacune. Le vrai & le faux sont ordinairement racontés du même ton par Diodore qui ne cherche, ni à éblouir, ni à surprendre. Si cet Historien paroît suivre souvent de bonnes guides, d'autres fois il se laisse égarer par Clitarque, dont il copie les récits

fa-

*fabuleux* [a] Ces défauts n'empêchent point que cette partie de son Histoire ne serve utilement à éclaircir plusieurs faits de la Vie de Alexandre &c. Jam qui neque diligens fuit scriptor, neque a fabulis abhorruit, maxime quum de Iudacis ageretur, neque denique Alexandri itinera exacte notavit, eum huius regis Hierosolyma ingressus non meminisse mirari non debemus.

XVIII. Neque profecto magis nos urget Plutarchi item silentium, postquam ipse qua ratione ad vitam Alexandri perscribendam se contulerit, ita declaravit; *Alexandri Regis vitam, & C. Caesaris, a quo est Pompeius oppressus, hoc Commentario descripturi, ob numerosas eorum res gestas, nihil praefabimur aliud, quam ab lectoribus postulabimus, si non omnia neque figillatim factum quoddam celebre admissum persequamur, sed perstringamus pleraque, ne mihi obstrepant. Neque enim historias, sed vitas conscribimus: neque semper clarissimae quaeque res virtutes vel vitia repraesentant, sed exiguum subinde factum dictumque, & iocans aliquis citius speciem edat morum, quam funestissima praelia, maximae acies & Urbium expugnationes. Ut ergo* Pictores ex facie & vultu,

E

(a) Vide Vesselingium Not. in Diodorum T. II. pag. 170. 216. 219. 220. 230. &c.

tu, ex quibus elucent mores, imaginem desumunt, nec de caeteris membris laborant magnopere; ita concedendum nobis est animi indicia ut perscrutemur, ac cuiusque per haec informemus vitam, aliis molem rerum & certamina permittamus. Idem Plutarchus praeter alia de Iudaeis commenta, putidissimam quoque illam calumniam de asini capite ab iisdem in Templi Hierosolymitani penetralibus consecrato excepit [a]. Quod factum etiam a Cornelio Tacito, quem perstringit Tertullianus [b].

XIX. E Graecis, quorum silentium nobis opponitur, unus superest Arrianus; eorum sane omnium, qui in rebus Alexandri conscribendis defudarunt, nobilissimus. Habet tamen is quaedam in sua ad libros *de Expeditione Alexandri* Praefatione, ex quibus causam possumus eruere cur Alexandri Hierosolyma ingressum praetermiserit. Fatetur in ea scilicet se Ptolemaeum Lagi, atque Aristobulum esse sequutum, quia eadem ambo tradiderunt, caeteros, quia inter se dissentientes, neglexisse: *Ptolemaeus Lagi*, inquit, & *Aristobulus Aristobuli filius quaecumque de Alexandro Philippi filio scribentes, eadem ambo commemorant, ea tan-*

---

(a) Lib. IV. *Symposiac.*

(b) *Apologet.* cap. 16.

*tanquam verissima conscribam: ex iis vero, in quibus inter se dissentiunt, quae mihi fide pariter & narratione digniora videbuntur, seligam. Certe de Alexandro alii alia memoriae prodiderunt, neque ullus est de quo aut plures extent scriptores, aut magis inter se dissentientes. Sed mihi Ptolemaeus & Aristobulus prae caeteris fide digni visi sunt: hic quidem quod Regi Alexandro socius expeditionis fuerit: Ptolemaeus autem, quia praeterquam quod una militavit, turpius in eo [quippe qui Rex etiam esset] mendacium, quam in alio quopiam esset futurum: uterque, quod mortuo iam tum Alexandro scribunt, quum neque necessitas neque merces, qua adducti aliter quidpiam atque accidisset scriberent, esset proposita. Non erraret autem, uti censeo, qui suspicaretur Ptolemaeum & Aristobulum, quos duces habuit Arrianus, ea solum suos in Commentarios retulisse, quae ad obsidiones maxime insignes, ac res ceteras magni momenti pertinerent, paucis ac generalibus verbis Regionum indigitatis deditioibus, & similibus; atque inde factum ut idem Arrianus posteaquam obsessam captamque Tyrum dixisset, antequam Gazae obsidionis descriptionem adgrediatur, atque conceptam animo ab Alexandro in Aegyptum profectionem, haec*

tantum [a] praemisit; *Et caetera quidem Syriae, quae Palaestina vocatur, oppida in suam potestatem adduxerat*; iis prorsus praetermissis, quae Iosephus retulit. Cum praeclarioribus certe Regis Macedonum gestis vix conferri posse videbatur Iudaeorum extra Hierosolyma occursus, quos Graeci aut vix noverant, aut despiciebant; eo vel maxime quod Alexandri comites similia frequentissime spectasse credibile sit, dum ille victor omnium fere gentium vel iure victoriae, vel spontanea populorum deditione urbes ingrederetur. Non potuit autem, nec vero debuit ea se ratione gerere Iudaeorum Historicus, qui in Archacologia sua sibi proposuerat Reipublicae Hebraicae formam, fortunae vicissitudines, Populi ad pietatem institutionem, bella tot saeculis suscepta, atque caetera, quae Annalium scriptor prae oculis habere debet, praecipue comprehendere ac enarrare. Quam multa is propterea certissima tum in Iudaicis Antiquitatibus, tum in libro de Bello Iudaico exhibuit, quae Graeci Romanique scriptores vel omiserunt prorsus, vel leviter attigerunt? Cuius, diligentiae illustre habemus exemplum in iis, quae de captis

a Pom-

---

(a) Lib. II. *De Expedit.*



a Pompeio Hierosolymis his verbis refert [a]:  
*Non mediocriter autem laesa est Templi religio,  
 inaccessi prius & pedibus [b] & oculis. Nam  
 Pompeius, & eius comitum non pauci in pene-  
 trale ingressi sunt, & ea viderunt quae ne-  
 mini alii mortalium, nisi Pontificibus solis, vi-  
 dere fas erat. Cum autem intus essent & men-  
 sa aurea, & sacrum candelabrum, & pate-  
 rae quibus libatur, & magna vis aromatum,  
 praetereaque in thesauris sacrae pecuniae ad  
 duo talentorum millia, nihil eorum prae pie-  
 tate attigit; sed hac in re convenienter suae  
 virtuti se gessit. Sequenti vero die iussis Aedi-  
 timis, ut Fanum purgarent, utque Deo liba-  
 rentur, quae lex iuberet, Pontificatum restituit  
 Hyrcano, tum propter alia eius erga se officia,  
 tum quia Iudaeos incolas Aristobulo auxiliari  
 prohibuerat, bellicque auctores securi percussit.  
 Quid vero tota hac de re Plutarchus in Pom-  
 peio retulit? Non alia profecto quam haec:  
 Iudaeam subegit, Regemque Aristobulum cepit.  
 Quid Appianus in Mithridaticis? Non plura  
 quam ista: Aretae Arabum Nabathaeorum Re-  
 gi bellum intulit, & Iudaeis, qui cum Aristobu-  
 lo suo rege defecerant; donec expugnavit Hie-  
 roso-*

---

(a) *Antiquit. Iud. Lib. XIV. cap. 4.*

(b) Haec deca Templi parte sunt excipienda in quam  
 ingredi soli Pontifici, & quidem semel tantum in anno,  
 fas erat.

*rosolymorum Urbem eis sanctissimam. Haec fufius in Syriacis : Una Iudaeorum gens armis subigenda superfuit : cuius Regem Aristobulum victor Pompeius Romam mifit, & Hierofolymorum, maximae sanctiffimaeque in ea regione Urbis, moenia diruit. Atqui nemo victoris in Templum Hierofolymitanum ingreffus meminit, non Plutarchus, non Appianus, ut ex his apparet, non Dio. Caffius, non Strabo, non Eutropius, non Orosius, ille fcilicet, cuius de re noftra filentium Vandalius exaggerat ; neque fane fortaffe. meminiffent Cicero, & Tacitus, nifi de recenti re, tum de profanatis Gentis Sacris actum fuiffet, quam ut maledicam & fufpiciofam oderant cane peius & angue : adeo fcilicet verum eft exactam abfolutamque rerum geftarum feriem ex probatis cuiufque gentis Scriptoribus efle repetendam. Longa item ac difficilis Hierofolymorum obfefio, in qua duodecim millia Iudaeorum cecidere, Pompeii facinus effecerant notius quam ut impune ab Historicis poffet omitti, qui non diu poft floruerunt. Tandem commentarios illos Ptolemaei atque Aristobuli, quos Arrianus praefertim fecutus eft, omnino accuratiffimos fuiffe valde dubitari poffe cenferem, maxime fi univerfa expendantur quae de everfis ab Alexandro Thebis, factaque ob id ab Athenienfibus*

bus gratulatione, idem commentatur [a].

XX. Venio nunc ad Latinos Historicos, Q. Curtium nimirum & Trogum Pompeium, sive Iustinum, quorum silentio quoque sese effert ac tuetur Vandalus. Et quoad Curtium quidem attinet, fateor me non valde eius silentio commoveri. Animadvertit vel ipse eiusdem editor & illustrator Tellierius hunc sive Rhetorem, sive Historicum incertae, si quisquam alius, aetatis, at certo Iosepho aliquot saeculis posteriorem, non geographiae solum, sed & historiae leges plerumque turbasse: parum scienter in praeliis describendis esse versatum: non satis accurately delectu vera a falsis secrevisse, ac denique speciosa magis quam certa haud infrequenter sectatum fuisse. Nec mirum, quum etiam Clitarchum ducem habuerit; illum scilicet de quo Quintilianus [b] aiebat *Clitarchi probatur ingenium, fides infamatur*; & Cicero [c]: *Concessum est Rhetoribus ementiri in historiis, ut aliquid dicere possint argutius... sic Clitarchus*. Plura Curtium narravisse aut diversis exornata circumstantiis, aut aliis intacta Scriptoribus satis patet ex Notis, ut aiunt, Variorum, quas Editioni suae omnium locupletissimae apposuit Sna-

---

(a) Lib. I. Cap. X. *De Expedit.*

(b) Lib. X. Instit. cap. I.

(c) In *Bruto*

Snakenburgius . Atqui ut iis fidem concilient eius Commentatores & Interpretes ea proferunt, quae Iosephi quoque vindicias satis bene conficiant . Sic Matthaeus Raderus ea defensusurus quae tradit [a] de legatis Alexandri a Tyris contra ius gentium interemtis , ait : *Ceterum nihil est, quod moveare Glareani suspicione, arbitrantis hanc de legatis occisis historiam esse falsam, quod Diodorus & Iustinus illam praeterierint ; quasi Iustinus & Diodorus non alia multa transmiserint silentio, quae Arrianus, & Curtius narrant . Quid si haec & alia habuere Callisthenes, Duris, Ptolomaeus, Aristobulus, & innumeri alii nobis inuisi, Curtio olim forte lecti ? Multa Aelianus, Poliaenus, Plinius adferunt aliis praeterita . Christophorus quoque Cellarius de excursionem verba faciens Alexandri in Mardorum gentem, a Curtio memorata [b], inquit : non ineptam hic disputationem ponit Glareanus ; habetque suspectam hanc Alexandri excursionem, cum nulla eius nec apud Diodorum, nec Arrianum mentio sit . Sed enim Curtius sua non tantum ex Diodoro hausit, sed multis aliis Graecis, qui hodie desiderantur . Infinitos ferme extitisse rerum Alexandri Scriptores , horum Catalogi a Ioanne Ge-*

---

(a) Lib. IV. cap. 2.

(b) Lib. V. cap. 6.

Gerardo Vossio, Ioanne Alberto Fabricio, aliisque confecti probant luculenter : hos autem omnes, vel potiore partem ad manus fuisse Curtio caeterisque, quorum silentium adversus Iosephum iactatur, aegre quisque concedet, qui paucissimos ab his laudari animadverterit. Quid ni ergo ab iis monumentis Alexandri adventum Hierosolyma Iosephus didicerit, quae aliorum diligentiam effugerunt? Quid etiam si his domestica accessere documenta, quum de re ageretur toti genti perhonorifica, eidemque etiam impolsterum profutura? Demum quaedam in Curtio leguntur, quae Iosephi fortasse narrationem contra Moylium confirmare queant, dum nempe moerorem ab Alexandro ob mortem Hectoris conceptum referens, haec addit (a): *Oneravit hunc dolorem nuntius mortis Andromachi, quem praefecerat Syriae: vivum Samaritae cremaverant. Ad huius interitum vindicandum quanta maxime celeritate potuit, contendit. Advenienti sunt traditi tanti sceleris auctores, Andromacho deinde Memmona substituit, adfectis supplicio, qui Praetorem interemerant. De eodem Andromacho haec item iam antea scripserat (b): Syriam quae Coele appellatur, Andromacho Parmenio*

F

tra-

(a) Lib. IV. Cap. 8.

(b) Lib. cit. cap. 5.

*tradiderat, bello quod supererat interfuturus.* Ad haec admonuit Cellarius causas interficiendi Andromachum non solum Samariae, sed & toti Palaestinae ab Alexandro praefectum, exactiones nimias, acerbiusque imperium fuisse. Quod certe acrius caeteris ferre Samaritae debuerant, nec a tributis anni septimi exempti, nec aliis privilegiis ab Alexandro honestati quemadmodum Iudaei. E Curtii etiam verbis ediscimus Alexandrum in urbe Samariae, Galilaeam inter & Iudaeam media, aliquando constitisse. Ecce ergo tum saltem intrare non potuit Hierosolyma, urbem utique multo clariorem, ob Templum praecipue, ipsorum etiam Ethnicorum testificationibus celebratum? Atque haec adversus Moylium urgemus praecipue, contententem Alexandrum ab his regionibus longe semper abfuisse.

XXI. De Iustini tandem silentio non est cur multis differamus; posteaquam vel ipse Vandalii, & Moylii sententiae ὑπερασπιστής, scilicet Anonymus Gallus de eodem ita pronuntiavit (a): *Iustin Abreviateur de Trogue-Pompée, vivoit sous le regne d'Antonin-Pie* (b). *Cet Auteur se fait lui-même son procès en relevant l'ordre & la méthode de son Original.* Dé-

---

(a) Loc. cit. pag. 37.

(b) Ger. Vossius de Hist. Latin Lib. 1. cap. XXXI.

Désordre dans la narration, inexactitude dans les faits, ce sont les défauts ordinaires de Justin, qui consacre les onzième & douzième livres de son ouvrage au récit des exploits d'Alexandre. La précision doit caractériser un Abrégé, l'Ecrivain Romain n'est cependant que superficiel, quand il parle de ce Conquérant. On ne peut guère s'en rapporter à son autorité &c. Visum tamen Isaaco Vossio, Strigelio, & Cantelio adventum Alexandri Hierosolyma, occursumque Iudaeorum illa Iustini designare (a): Memor tamen Darium adhuc vivere, Parmenionem ad occupandam Persicam classē, aliosque amicos ad recipiendas Asiae civitates misit: quae statim audita fama victoriae, ipsis Darii praefectis cum auri magno pondere tradentibus se, in potestatem victorum venerunt. Tunc in Syriam proficiscimur, ubi obvius cum insulis multos Orientis reges habuit. Ex his pro meritis singulorum alios in societatem recepit: aliis regnum ademit, successis in loca eorum novis regibus. Quae eruditos viros impulerint ut ita sentirent, me prorsus latent. Fortasse Insularum mentio excitavit, quas non solum supplicantium, sed & Sacerdotum olim proprias fuisse dum victimas resque alias sacras procurarent,

---

(a) Lib. XI. Cap. X.

compertum est. Fortasse etiam ipsum Iudaeorum occursum, *Regum Syriae* nomine, obscure licet, indicatum sibi persuasere, praecipue quam rerum Iudaicarum Gentiles plerumque inficii, eas per ambages veluti repraesentarent. Ac revera Summum Iudaeorum Pontificem caeterosque ex ordine Levitico Sacerdotes, qui obviam Alexandro processere, Reges quodam modo videri potuisse quivis assentietur, si secum reputaverit in Synedrio, eiusque capite honorem fulsisse regiae dignitati proximum, auctoritatemque haud multo regia inferiorem. Hinc ab usu etiam Graecorum non abhorruisse scimus, ut ii, penes quos potestas, atque cura sacrorum suprema esset, uti erat apud Iudaeorum Pontifices Synedriique Praefides, βασιλεῖς appellarentur. Sic qui inter Archontas Atheniensium locum tenebat ordine secundum, βασιλεὺς vocabatur, licet partes praecipuae eius muneris sacris in rebus procurandis versarentur, ut monitum hoc & aliis exemplis a Ioanne Gothofredo, Lackemachero (a). Fortasse etiam quae de Syriae Regibus Iustinus enarrat partim ab Alexandro in amicitiam receptis, partim regno privatis ad ea accomodari posse Vossius, & Strigelius crediderunt, quae de

---

(a). Part. X. *Observat. Philologicarum* Observ. V.



de Iudaeis, & Samaritanis a Iosepho memorantur, quum hi nec privilegiis fuerint ab Alexandro cumulati, nec eorum civitas servata sit; illi e contra in amicitiam, ac foedus fuerint recepti, tum privilegiis atque honoribus cohonestati. Fortasse demum, Sanaballetis, Samariae Satrapae a Dario constituti, ad Alexandrum defectionem, ut narrat Iosephus, Iustino in caussa fuisse cur Reges quosdam Syriae obviam ivisse Macedoni dixerit, sibi in animum induxerunt. Sed his, quae coniiciendo protuli, ut illorum Eruditorum sensus divinarem, duo a Iosepho commemorata adversari videntur, & alterum quidem dum refert Parmenionem Iudaeorum occursum spectatorem fuisse, qui tamen, si Iustino credimus, tum aberat cum Syriae Reges Alexandro obviam ivere: alterum autem dum item narrat idem Iosephus Syriae Reges sive Satrapas, ac regulos omnium officiorum testes fuisse quae Alexander erga Iudaeos prestitit iam iam ingressurus Hierosolyma. Atqui in eo sibi Iosephus, Iustinusque consentiunt, quod uterque in Alexandri comitatu Syriae Reges fuisse prodiderit. Sed & Iustinum quoque ipsum, sive potius Trogum Pompeium, cuius ille libros in epitomen redegit, rerum Iudaicarum inscium fuisse ex eo patet quod Hebraeos ob scabiem & vitiliginem

nem ab Aegypto fuisse expulsos scripserit (a). Quam calumniam ne Tolandus quidem, Spinosa ipso quandoque nequior, & impudentior, a se impetrare potuit ut probaret, cui tamen in designanda Iudaeorum origine potius fuit Strabonis commentum, quam earum Scripturarum auctoritas, in quibus gentis suae Historiam Moses contexuit. Sic enim Strabo (b): *Cum mixtae sint originis, fama quae maxime invaluit, perhibet eos, qui nunc Iudaei appellantur, ab Aegyptiis fuisse propagatos.* Ita ne ii quidem, qui multo candore Historias composuerunt, a falsis vero commiscendis abstinere potuerunt. Tanta scilicet erat tunc temporis etiam gentis Iudaicae execratio, fastorum eiusdem ignoratio tanta; ac praeterea adeo copiosa fabularum mendaciorumque adversus eam in vulgus editorum seges, ut in haec vel oculatiores impingerent.

XXII. Praecipua exceptione, quae ex Scriptorum Alexandri rerum silentio ducebatur, satis, uti reor, extricata, reliquae iam sunt expendendae, atque, ut ordinate procedamus, quemadmodum iam innuimus, illa cumprimis, quae ex Iaddi Iudaeorum Pontificis, tum Sannaballetis Samariae Satrapae, aetate depromitur

---

(a) Lib. XXXVI. cap. 2.

(b) Lib. 16. *Geograph.*

tur. Horum sane virorum vel solam mentionem a Iosepho factam, eius narrationem prorsus evertere, ac digito veluti monstrare puram putamque esse fabulam, Moylius arbitratur. Chronici Alexandrini sive *Paschalis* auctoritati innixus, in quo Iaddi Pontificis obitus aliquot annis consignatur, antequam Darius Codomannus regno potiretur. Confirmare hanc animadversionem Newtoni calculis nititur Anonymus Gallus (a), ac posteaquam admonuit optime ab illo extricatam illustratamque fuisse successionem Summorum Pontificum, qui post servitutem Babyloniam sacris Iudaeorum rebus praefuere, cum (b) eodem statuit Iaddum aevo Artaxerxis Mnemonis floruisse; Simeonem autem Iustum, uti & Iudaei ipsi tradunt, suprema Sacra obiisse quo tempore Graeci Persarum imperium invadere, cum scilicet Oniae patenti suo, Iaddi autem filio, successisset. His addam ego, ne quid dissimulem, testimonium, caeteris adductis gravius, nimirum Nehemiae Scriptoris Libri, qui secundus *Esdrae* dicitur, in quo capite XII. v. 22. commemoratur *Ieddo* sive Iaddus inter caeteros *familiarum Principes, & Sacerdotes in regno Darii Persae*. Quae & si Newtoni calculis adver-

---

(a) Lib. cit. pag. 67.

(b) *Chronolog. Emendat.* pag. 395. & seqq.

adversentur, gravissimam tamen adversus authenticitatem huius libri difficultatem pariunt, coguntque nos aut affirmare Nehemiam eius auctorem esse non posse, quod vel cogitare nefas viro Catholico, aut cum ipsius, tum vero etiam Iaddi aetatem si Iosephi narratio comprobetur, eo usque protrahere, quo vix vel primaevi homines pervenerunt. Nec revera aliud novae ac temerariae suae opinionis argumentum habuit Spinosa, litigator acerrimus, & ubique contentiosus, quam quod ex capite Nehemiae duodecimo erui posse videtur, ut (a) negaret ab Esdra, & Nehemia libros esse scriptos, qui sub eorum nominibus feruntur, ostenderetque longe post instauratum a Iuda Machabaeo Templi cultum a Sadducaeis fuisse confictos, forte ea de causa, ut populo ostenderent Danielis Prophetias adimpletas esse, atque eum hac ratione in religione confirmarent, ne de melioribus & futura salute in tantis calamitatibus desperarent. Animadvertit nempe citato capite duodecimo cum nomen Iaddi reperiri, qui Iosepho teste obviam prôdiit Alexandro Hierosolyma eunti, tum Darii qui Codomannus cognominatus est; adeoque esse prorsus incredibile, ut Esdras, aut Neh-

---

(a) *Tractat. Theologico-Polit. cap. 10.*

hemias adeo longaeui fuerint, ut post Cyrum tot inde Persarum Regibus supervixerint. Atqui haec Spinosa argutatio plurimum roboris perdit si Iosephi narratio deferatur,

XXIII. Sed haec tanti non sunt, ut in tantas nos angustias coniciant, compellantque Iosephi narrationi valedicere. Implicatam esse Pontificum Hebraeorum seriem successionemque cum doctissimis viris non illibenter fateor, neque tamen annuo Newtonum, hoc genus argumenti mirabiliter, ut creditur, ita extricasse, ut eius calculi in re, de qua agimus, sint Iosephi testificationi praeferendi. Ac cum duo quidem sint, quae in Pontificum Hebraeorum Catalogo inquisitione opus habent: alterum quinam, & quot numero fuerint; alterum quo, quantove tempore in magistratu versati sint; utrumque propter Historicorum vel dissensionem vel silentium mire est impeditum. Nam Scriptura, e qua lux aliqua obscurissimae quaestioni poterat expectari, multos e prioribus, quos solos attigit, praetermisisse videtur; & hos ipsos, quorum meminit, perobscure fuisse Pontifices declarat. Intervalla porro singulorum, vel quo tempore vixerint, funditus omisit. Unus subsidio nobis est Iosephus, a quo viri doctissimi Usserius, Petavius, Seldenus, & alii, qui Pontificum Catalogos con-

G

te-

rexuerunt, seriem expresserunt, in subsidium etiam accitis Eusebio, Nicephoro, Hebraeorum Chronico, & aliis huiusmodi, ex quibus apparet non male ab illo Iaddi Pontificatum, Alexandro Magno regnante, constitutum fuisse. Quis enim vero Iosepho tuto praeferat Chronicon Paschale post ea, quae de Chronologia mire in eo perturbata, Bailletus, Tillemontius, alique observavere? Quis eidem Rabbinos anteponat, quos & antiquitate & iudicio, ac praeterea monumentis superat, eorundem aetate iampridem absumptis? His adde *Simeonem* illum *Iustum* a Rabbiniis ipsis interdum *Iaddo* vel *Iddo* (a) nuncupari; ut inde verisimilem esse eorum opinionem possis agnoscere, qui volunt unum eundemque Pontificem, pluribus fuisse nuncupatum nominibus, aut pluribus Pontificibus unum idemque nomen fuisse inditum; qua ex re, uti & ex variarum linguarum Hebraicae, Assyriacae, Aegyptiacae, & Graecae usurpatione cum miram varietatem nominum, tum confusionem processisse animadvertit Iosephus Voisinus [b]. Hanc etiam ob causam mirum non est, si

*Elia-*

(a) Quod ostendit Io. Vossius in Notis ad Lib. II. Hist. Severi Sulpicii.

(b) Cap. 9. Observat. ad Proemium *Pugionis Fidei* Raymundi Martini.

*Eliachimi* Pontificis nomen, cuius in historia Iudith mentio fit, neque in Pontificum genealogiis ante servitorem Babylonicam perscriptis, neque in Scripturis, neque apud Iosephum extet apertissime. In Capitibus enim XXII. & XXIII. Libri IV. *Regum* creditur hunc *Eliachimum*, sive *Ioachimum* nomine patris Helciae appellari; in Paralipomenis autem, & in Baruchi Prophetia, ubi Helcias filius Sellum, & pater Azariae dicitur, nomen patris pro avo, & nepotis pro filio poni, ut Helcias pater sit *Ioachimi*, hic autem Azariae, quod in Scripturis non est insolens, neque eget exemplis ut probetur. Ex universis etiam Scripturis ab Aarone usque ad reditum a servitute Babylonis numerantur Pontifices XXVIII., quot numerat Iosephus, mutatis tamen nominibus quibusdam, atque inverso ordine. At ex libro I. Paralipomenon sigillatim XXIV., ex *Séder Olám*, sive *serie Temporum* Talmudistarum XXV. In eundem scopulum incidunt; qui ab aedificatione Templi secundi usque ad Titum Catalogum Pontificum conficiendum susceperunt; quorum alii augent numerum, alii minuunt, atque in appellandis nominibus discrepant. Quid autem tanta varietas indicat, nisi in Sacris Bibliis uni Pontifici plura nomina, vel Pontificibus pluribus unum nomen

esse tributum ? Atqui dum Sacrae Litterae aut silent, aut aperte non loquuntur fatius perdoctis Chronographis visum est Iosephum, quam incertos Rabbiorum calculos, aut indiculos consuetari. Neque sane mihi ullo modo in animum inducere queo, ut Iosephus, maxime si fabulam voluit contexere, quemadmodum placet Vandalio, qua genti suae successorum Alexandri benevolentiam conciliaret, ne verum quidem nomen Pontificis posuerit, qui tamen totius rei pars magna fuit.

XXIV. Haftenus autem animadversa non evertunt, neque Nehemiae libri *αὐθεντικὰ* labefactant quae Spinosa regerit. Hunc errare primo ait Huetius [a] dum vult Nehemiam Cyri temporibus floruisse, a quo Iudaei Templum reaedificandi veniam impetrarunt, quum tamen Artaxerxis aequalis fuerit. Constituit deinde eundem Nehemiam puerum fuisse cum primum in Iudaeam profectus est, ut qui Regi esset a poculis, quo ministerio fere pueri fungebantur; iter autem illud incidisse in annum vicesimum Longimani. Hunc autem si regnum esse auspicatum ponamus. anno Periodi Iulianae 4249., incidet vicesimus in annum

---

(a) *Demonstrat. Evang. Proposit. IV.*



num eiusdem Periodi 4269. , a quo tempore ad obitum Darii Codomanni, annum videlicet 4384. intercedunt anni centum & quindecim. Itaque si Artaxerxis vicesimo, annum aetatis egerit decimum sextum Nehemias, natus erat annos circiter centum triginta & unum cum obiit Darius; quod profecto, neque mirum, neque novum esse, optime exemplis a Scaligero [a] demonstratum fuisse concludit. Non probat doctissimi Praefulis responsum Natalis Alexander, admonens Nehemiam eos inter numerari [b] Iudaeorum proceres, qui anno primo Cyri Persarum Regis cum Zorobabele Hierosolyma ascenderunt. Quo tempore si vel sexdecim annorum fuisse ponatur, natus fuerit necesse est annos ducentos, & triginta circiter cum Darius Codomannus obiit: quod profecto incredibile est [c]. Sed quis praestabit Darium istum esse Codomannum ab Alexandro superatum, non autem Darium Nothum, qui tertius ab Artaxerse Longimano regnavit, & quadraginta circiter annis a reditu Nehemiae vitam clausit? Quis etiam pro certo affirmet Iaddum in eo Nehemiae capite commemoratum iam tum

---

(a) *De Emendas. Temp. Lib. VI.*

(b) *I. Esdrae II. 2.*

(c) Vide eiusdem Dissert. VII. ad VI. Mundi aetatem Art. III.

tum Pontificem fuisse? Fortasse Iaddus natus est prope finem [a] vitae Darii Nothi, vel Artaxerse Mnemone regnum ineunte, & Alexandrum in Urbe excepit senex quidem, at nondum annis LXXX. maior. Sed detur & Darium Codomannum, & Iaddum iam Pontificem ibidem designari; Textum illum non Nehemiam scripsisse dicendum est, sed posteriorem alterum auctorem, Spiritu Dei utique plenum, apposuisse, ut Appendicem catalogo a Nehemia confecto. Quam responsionem quorundam aliorum auctoritatem secutus amplexus est magnus Petavius [b]; nec erat sane cur illam improbaret Huetius, qui alibi fateatur Scripturae Sacrae reparatorem Esdram, sicuti se darent obscuriores ac difficiliore loci, huc & illuc de suo nonnulla in Libros Sanctos explicationis causa infarsisse. Cui sententiae alii etiam exquisitae doctrinae, ac pietatis viri suffragantur, eamque plura exempla esse verissimam commonstrant. Atque ut aliqua ponamus, in capite ultimo Deuteronomii mors & sepultura Moysis describitur, atque commendatur ut Prophetarum maximus, cui similis nemo ultra in Israël surrexerit. Narrationem istam Mosem ipsum spiritu prophetico texuisse, sibi que

---

(a) Usserius ad A. M. 3602.

(b) *De Doctrin. Temp.* Lib. 12. cap. 25.

que meritas dedisse laudes, Deo intus movente, Philo, Iosephus & Hebraeorum plerique respondent. At interpretes alii, ut responso solidiore Spinofam pestilentem refellant, plerumque dicunt, ultimum istud caput, in quo ista de morte Mosi enarrantur, vel a Iosua, vel ab Esdra, vel a Synagogae magnae viris appositum fuisse, ne quid ad librorum Pentateuchi absolutionem desideraretur. Neque id inepte: si enim Esdras Libros Sacros recensuit, si Iosuas filios Israël vice Mosi in terram Chanaan deduxit, verisimillimum est alterum voluisse finem vitae Mosi Legislatoris ad calcem totius legis commemorare. Libro etiam Iosuae ad pleniorē rei expositionem ab Esdra additos fuisse communiter creditur locos duos capitis XV. & XIX. de portione Calebo data, de filiae nuptiis cum Othoniele, deque expeditione Danitarum, quoniam post Iosuae mortem ea contigisse ex Libro Iudicum docemur. Postrema duo commata Libri Tobiae recentiorē Auctorem, qui patris filiiq; scripta collegerit, habere, doctiorum interpretum sententia est. Idem iudicium ferri potest de Ieremiae Prophetiis, in quibus caput LII. Scriptor alter cum prioribus contexuit, ut verbis caput LI. finientibus monemur: *Huc usque verba Ieremiae*. A Barucho caput istud subnexus quidam

dam iudicant: alii verius ab Esdra repetente dicere compendio excidium Hierosolymorum, atque ea, quae Babylone usque ad Iechoniae obitum evenerunt ex libro IV. Regum in hoc caput translata, ut Prophetiae Hieremiae lux afferretur, & Lamentationibus praecipue, quae olim unicum cum Prophetia librum efficiebant. Quid enim fuisset causae cur Ieremias, aut amanuensis Baruchus casum Sedeciae iterum narrarent prolixius, quem in capite XXIX. iam satis narraverant? Sed exemplorum satis. Nec solum citata verba versiculi 12. capitis XII. Nehemiae Libro sunt addita, sed etiam, si quibusdam credimus, totum caput istud duodecimum ab initio ad v. 27. assutum est, quippe cum superiore & consequente oratione non colligatum, & Historiae cursum intercipiens. Etenim Nehemias modo explicato, quem tenuerat in instaurandis Hierosolymis, familias atque homines Urbem incolentes in capite XI. enumerat: His expositis ordo veluti postulabat de murorum Urbis dedicatione sermonem fieri, qui a versiculo 27. incipit. Igitur quaecumque de successione Levitarum, & Summorum Pontificum interiacent a fine capitis superioris nativa non sunt, sed inserta. Initium ipsum capitis, & vicesimum sextum comma videntur indicium alterius auctoris praefecisse

se ferre, repetentis censere Levitas, & Sacerdotes, qui cum Zorobabele Hierosolyma ascenderant. Initium est: *Hi sunt autem Sacerdotes & Levitae qui ascenderunt cum Zorobabel*; clausula vero commate 26. *Hi in diebus Ioacin, filii Iosue, filii Iosedeck, & in diebus Nehemiae Ducis, & Esdrae Sacerdotis Scribaeque*. Hisce exemplis edocti in eorum sententiam concedimus, qui putant quaecumque ex capite XII. Nehemiae Spinosa arripit, non ab ipso Nehemia, sed ab alio scriptore, utique *ἱστορίῳ* exarata fuisse.

XXV. Nec magis proficit aut Spinosa Nehemiae Libri impius contemptor, aut Moylius Iosephi adversarius dum uterque regerit, caput XIII. sine controversia a Nehemia totum scriptum dici, & tamen versu 28. nominari generum Sanaballetis Horonitis Sacerdotio expulsum: *De filiis autem Ioada filii Eliafii Sacerdotis magni gener erat Sanaballat Horonites, quem fugavi a me*. Ex quibus colligit Spinosa libri huius Auctorem nonnisi Alexandri aetate vixisse, quum ex Iosepho constet generum huius Sanaballetis fuisse Manassem Iad-di fratrem, atque insuper Sanaballetem a Dario ad Alexandrum defecisse: Moylius autem ait falsum esse Iosephum dum hominem a Nehemia cognitum ad aevum usque Alexandri

vitam produxisse scribit. Nodem hunc interpretes solaturi, communiter fere respondent, si constaret generum Sanaballetis esse Manassem Iaddi fratrem, socerumque ad Alexandrum deflexisse, confectam rem esse ad Spino-fae sententiam; sed falsum esse Iosephum, qui ex duobus Sanaballatis unum fecit, & quod unius erat alteri attribuit, cum pontificia nimirum Familiae affinitatem. Itaque duos fuisse Sanaballatos statuunt, unum Artaxersis Longimani, alterum Alexandri temporibus; prioris autem generum Sacerdotali officio propter profanum cum hominis Samaritani filia coniugium exclusum a Nehemia fuisse. Porro gener iste, inquiunt, esse frater Iaddi nequivit, sed patruelis, filius scilicet Ioiada, & frater Iohannan patris Iaddi, quem plane abigere potuit Nehemias, quum septuagesimum fere aetatis annum ageret. Addit Petavius [a] bis fortasse cum Samaritanis affinitatem iunxisse Pontificiam domum; primum Nehemiae, & Artaxersis Longimani tempore quempiam ex filiis Ioiadae Sanaballetis filiam duxisse, obidque a Nehemia esse reiectum; postea Manassem, Iaddi fratrem, Sanaballetis minoris & prioris nepotis filiam itidem in matrimonium obtinuisse.

Sed

---

(a) Loco cit.

Sed dum haec os obstruunt Spinofae Iosephum videntur ex parte condemnare. At vero duos Sanaballatos ab eo fuisse confusos quomodo ostenditur? Unius quidem ille meminit, alterius nomen silet, nihilque habet, ex quo possis agnoscere cum de Sanaballetē Manassis cognato agit, loqui de altero voluisse, quem novit Nehemias. Ac Sanaballetem ab hoc longe diversum memorare voluisse ex eo posse coniici puto, quod is, qui nefarias fratris Summi Sacerdotis nuptias, tum ob id erectionem Schismatici Templi ad enarrandum susceperat, haud esset oblitus admonere Sanaballetem, qui Manassi fuerat praesidio, eundem illum fuisse, quem iam vir sanctissimus Nehemias diris devoverat. Monet etiam conceptis verbis Iosephus Sanaballetem suum missum fuisse in Samariam Satrapam a Dario ultimo Persarum rege, ut ab altero nempe eiusdem nominis secerneret, qui Iudaeis Hierosolymorum moenia reficere volentibus fuerat impedimento.

XXVI. Quae de suorum cum foeminis alienigenis coniugiis idem refert, nullam habere difficultatem possunt, quum Sacris Litteris, huiusce aetatis historiam moresque referentibus, apprime consonent. Quamquam enim pro hisce excindendis connubiis, plurimum Esdras laborarit, ut eius ex Libro apparet, tum eum-

dem in abusum felici successu declamarit Nehemias, ut idem testatur [a]; quia tamen Babylonem profecturus abesse debuit Hierosolymis, non defuere qui inde occasione arrepta pristinas denuo sibi uxores sociaverint; & quamvis Urbe, ac Templo exclusi ab eodem Propheeta fuerint, nihil tamen proximius vero, quam consequenti tempore plerisque alios horum esse exempla sequutos, atque hos inter Manassem summi Sacerdotis fratrem extitisse.

XXVII. Idem de Tributis dicimus, quae ab Iudaeorum Pontifice Alexandrum poposcisse narrat Iosephus. Quamquam enim a servitute Babylonica reduces Hebraei suam quodammodo instaurarint Rempublicam, nusquam tamen plena sunt potiti libertate, sed Persis primum, deinde Graecis, tum Romanis tributa pependerunt. Atque ut unice eorum temporum repetamus politiam Iudaicam, de quibus agimus, inimici Iudaeorum in haec verba ad Cambysen scribebant [b]: *Nunc notum sit Regi, quia si civitas illa aedificata fuerit, & muri eius instaurati, tributum & vectigal & annuos redditus non dabunt.* Regnante autem Artaxerse Longimano ita Deum exorabat Nehemias [c]:

*Ecce*

---

(a) II Esdrae cap. IX. 1. 2. & cap. XIII. 6. & seqq.

(b) I. Esdrae cap. IV. v. 3.

(c) II. Esdrae IX.



*Eccē nos ipsi hodie servi sumus, & terram dedisti patribus nostris, ut comederent panem eius, & quae bona sunt eius, & nos ipsi servi sumus in ea; & fruges eius multiplicentur Regibus, quos posuisti super nos propter peccata nostra, & corporibus nostris dominantur, & iumentis nostris secundum voluntatem suam, & in tribulatione magna sumus. Alterum Hebraeorum huius temporis servitutis argumentum est, quod nonnisi ex Persarum Regum arbitrio duces, & magistratus habuerunt. Zorobabelem a Cyro ducem populi constitutum fuisse compertum est (a). Vasa Templi Dei aurea, & argentea idem Cyrus de Templo Babylonico protulit. Certum est etiam Esdram ab Artaxerxe Longimano potestatem accepisse visitandi Iudaeam, & Ierusalem, ibique constituendi magistratus (b). Quod idem & de Nehemia patet. Ita quum pendendis tributis obnoxii essent Iudaei, ac iuxta legem in Exodo [c] & Levitico [d] latam quivis annus Sabbaticus, sive*

---

(a) I. Esdrae.

(b) Esdrae II VII. 25.

(c) XXIII. 10. 11.

(d) XXV. 4. Subiicitur quidem v. 21. & seq. *Dabo benedictionem meam vobis anno sexto, & faciat fructus trium annorum: seretisque anno octavo, & comeditis veteres fruges usque ad nonum annum: donec nova nascantur, edetis vetera. Quod singulare Divinae providentiae beneficium, ut*  
alia

septimus in ἀγρονομία hoc est agriculturae cessatione confisteret, nihil opportunius, aut utilius, ingens aliquod beneficium iussi ab Alexandro petere, impetrare potuerunt, quam a tributis quovis anno septimo non pendendis immunitatem. Quum scilicet res, omnesque eorum opes ab agrorum cultura dependerent, ex hac vel illorum abundantia, vel egestas nascebatur; cuius rei maximum argumentum est quod exteri reges quoties iis pecunias imperaverunt, septimus quisque annus in augustum ita omnes eorum copias coegit, fere ut persolvere eas nequiverint; nam erat legis edicto cautum, ut diximus, ne per illud tempus terra coleretur, neve quis fruges tunc colligeret, quae omnis pecuniae fundamentum erant. Quam facile vero debuit Macedonum Rex, Danielis Vaticinio de Persarum imperio a Graeco homine destruendo iam laetus, genti illud ingens beneficium concedere! Sollicitaverat is quidem ad deditionem laddum, iis propositis conditionibus, oneribusque, quibus ad id usque temporis Dario serviverat. Quae licet recusaverit pri-

---

alia plurima, Hebraei experti sunt quoadusque ob eorum scelera fuere in captivitatem abducti ab exteris Regibus, quorum gravissima onera iis imposita passim Prophetae percensent, & quoad tempora attinet, de quibus nobis est sermo, Esdras & Nehemias. Consule Nicolaum in observationibus ad Libros de *Republ. Hebraeorum* Caroli Sigonii.

primam Iadus, Regibus Persarum suam sacramento fidem obligasse causatus, non ob id propterea est cum Anonymo Gallo levitatis incusandus, si parendum postea victori censuit, cum & nihil iam praesidii in Pertis sibi manere intelligeret, & victoris armis repellendis Iudaei impares esse prorsus viderentur. Similia autem clementiae exempla non semel praebuit Alexander, adeo ut Q. Curtius de Uxiorum gente ab eo subacta scripserit [a]: *moderationem, clementiamque Regis, quae tunc fuit, vel una haec res possit ostendere, non Madati modo ignovit, sed omnes & deditos & captivos libertate, atque immunitate donavit: Urbem reliquit intactam: agros sine tributo colere permisit*. Indiguissetem Alexandrum Tyrum obsidentem commeatibus facile quisque sibi persuaferit, qui noverit Tyrios terrae excolendae non vacasse annonamque frequenter a Iudaea [b] petiisse.

XXVIII. Nec minus cum Sacris Litteris conveniunt, quae Iosephus prodidit de Templo in monte Garizin in finibus Tribus Ephraim & Manasse sito, Sanaballetis opera, Alexandri autem favore celerrime extructo. Sanaballetis certe in filiam amor ac studium, tum sponsi Manassis a Summi Sacerdotii dignitate deie-

ctio

---

[a] Lib. V. cap. III.

[b] Consule Interpretes ad cap. XII v. 20. *Act. Apostol.*

Etio, facile utrumque ad grave aliquid audendum impellere poterant. Profecto qui veteres, recentioresque Auctores consuluerit, comperiet illico Samaritani Templi originem a nemine probabilius quam a Iosepho traditam, & explicatam fuisse. Saepe certe iactavere Samaritani se eo in monte Templum habuisse Hierosolymitano vetustius, quum tamen sub Artaxerxe Longimano nullum adhuc haberent, ac propterea summo opere, quamquam frustra, peroptarint illud una cum Iudaeis excitare Hierosolymis, ut his verbis auctor est Esdras (a): *Audierunt autem hostes Iudae & Benjamin, quia filii captivitatis aedificarent Templum Domino Deo Israël & accedentes ad Zorobabel, & ad principes patrum dixerunt eis: Aedificemus vobiscum, quia ita ut vos, quaerimus Deum vestrum: Ecce nos immolavimus victimas a diebus Asor Haddan Regis Assur, qui adduxit nos huc. Et dixit eis Zorobabel & Iosue, & reliqui principes patrum Israël: non est nobis, & vobis, ut aedificemus domum Deo nostro, sed nos ipsi soli aedificabimus Domino Deo nostro, sicut praecepit nobis Cyrus Rex Persarum. Facile est igitur, ut populus terrae impediret manus populi Iudae, & turbaret eos in aedificando.*

---

(a) I. cap. IV. v. 1. & seqq.

*do*. Non uno in loco Garizitani Templi originem repetit Iosephus, qui etiam consuetudinem & amicitiam memorans, quam Onias habuit cum Ptolemaco Philometore, hoc sub principe disputatum fuisse refert (a) de utriusque Templi Hierosolymitani, & Garizitani vetustate, ostensumque a Iudaeis fuisse ex perpetua Sacerdotum successione, aliisque monumentis, illud solum legitimum, atque ad Mosis praescriptum aedificatum esse reputandum. Huiusce disputationis meminit quoque Samaritanus Chronologus, a Ioanne Nicolaio laudatus (b); qui tamen Chronologus pudendo metachronismo Nabucadnezzarem pro Ptolemaco ponit, suaeque religionis hominibus palmam tribuit, ut videre etiam est apud Hottingerum (c). Seduna item Patriarcha Gazensis in Relatione de Samaritanis, ab Athanasio Kirkerio exhibita, (d) ita scribit: *Illo tempore cum discederet Alexander e Ierusalem, egressus est ad eum Sanaballetes cum Israël, & filiis Iosue Sacerdotis magni, qui affinitatem contraxerant cum Cuthaeis, quosque fugaverant Esdras & Nebemias a Domo Domini,*

## I

pe-

---

(a) *Antiquit. Iud.* Lib. XIII cap. 3.

(b) In notis ad c. 16. Libri II. Petri Cunaei *De Repub. Hebr.*

(c) Exercit. Ante mor. Sect. XLIX. pag. 66. & seq.

(d) *Syntagmat.* IV. fol. m. 363.

petiitque ab Alexandro, ut Sacerdotes generis sui aedificarent Templum in Monte Garizin; quo facto divisus est Israël in duas partes; pars populi secuta est Simeonem Iustum, & Antigonum discipulum eius, & congregationem eorum, iuxta id quod ab Esdra, & Prophetis acceperant; pars autem alia Sanaballet, & generos eius, obtuleruntque holocausta, & sacrificia extra domum Dei, & commentum sunt de corde suo instituta, & simulacra gentium. Hinc non male Mons transgressorum nominatur, quod Iudaei profugi portum quasi, & locum salutis illic haberent. Denique in Hypomnestico Iosephi, Christiani Scriptoris, edito a Fabricio (a), in quo series Pontificum Iudaeorum describitur, laddus ordine trigessimus tertius sic memoratur: *Iaddaeus, sub quo Templum conditum est in Garize*. Ita hoc erecto Templo, inter Iudaeos & Samaritanos, quos iam antea Esdras, utpote Templi Hierosolymitani Urbisque adeo ipsius instaurationem interpellantes, diris devoverat, & horrendi carminis pronuntiatione sacros & infames esse iusserat, vetera ita crevere odia, ut nulla unquam maiora vel inter inimicissimos exarserint. Tempore ab hoc nullus amor populis, nec foede-

ra

---

(a) Cod. Apocryph. N. T. cap. 2.

ra fuerunt, sed implacabile dissidium, ut dixi, quod ad hanc usque diem perseverat. Nec sane sese implicat Iosephus dum Samaritanos introducit rogantes Alexandrum, ut & Templum Garizitanum praesentia sua decorare iam velit, quasi scilicet Tyri obsidionis intervallo, quod septem menses non excessit, Templum illud, quod eius initio coeperat aedificari, absolutum fuisset: satis enim id intelligitur si Flaviam narrationem de praecipuis Templi Samaritanorum partibus excipiamus, quae peragendis sacrificiis deservirent, non de totius Operis structura & complemento. Sic in Templo Hierosolymitano, quod tamen nonnisi spatio quadraginta annorum absolutum fuit, multo ante Iudaei sacrificia aliaque peregere. Iosephi porro sententiae non incommodant Samaritanorum iactationes, ut diximus. Venditavere ii quidem Abraham, aliosque Patriarchas in Garizitano Monte sacra fecisse, eoque loci a Iosua cum Aram fuisse positam, tum Templum extructum, in quo Sacerdotes ex Aaronis progenie ad hanc usque diem Sacerdotale munus obierint; verum, ut antiqua haec commenta, quae eorundem Chronica recenter edita complectuntur, aliquo modo confirmarent, necesse habuerunt Hebraicum Pentateuchum depravare, & in locum nominis *Hebal* quod illo

veri similitudine non abhorre manifestant potuisse Alexandrum, aut iam coepta Gazae obsidione, aut ea absoluta proficisci Hierosolyma, ne videlicet iam iam in Aegyptum profecturus Urbem post se linqueret celeberrimam. Et fuisse vero Alexandro in more positum, ut hac illac excurreret etiam dum res magnas urgeret, testantur quotquot de eiusdem vita, factisque commentarios ediderunt. Sed ne quidem huius sententiae tenaciores esse volumus. Cum breviori, tum commodiori via potuisse Alexandrum Hierosolyma pergere, dum scilicet, expugnata Tyro, Gazae obsidione, tum iter in Aegyptum decrevit, & ipse Iosephus agnovit, dum admonuit illum Iaddi Hebraeorum Pontificis intellecta voluntate, persistendi scilicet in fide regibus Persarum data, non statuisse Tyri obsidionem relinquere, sed esse minatum, se, ea subacta, statim insensa signa in Iudaeos esse laturum. Quid vero si Iosepho inde somnus obrepit in re non magni momenti, narravitque regis accessum Hierosolyma post Gazam captam, qui post Tyri obsidionem verisimilius evenerat? Temporum rerumque inversionem, historiae cuiusque non labefactare veritatem explorata res est; & id vero nisi ita sit, paucissima iam in Alexandri Historia reperientur, quae probari tuto possint, quum



quum vix unum eiusdem facinus sit, quod iisdem circumstantiis, eodemque ordine ab Arriano, Plutarcho, Q. Curtio, Diodoro Siculo, Iustino, Strabone, & aliis fuerit memoriae commendatum. Alexandrum porro capta Tyro Gazam versus perrexisse ad laevam mare habentem iidem illi Scriptores fidem faciunt, qui Iosepho obiiciuntur. Quid igitur verisimilius, quam dum iter faceret cum Urbem potuisse invisere, a cuius moenibus non multum aberat, ut Tabula ostendit huic exercitationi praemissa, tum Templum, quod vel Alexandri ipsius, & Ptolemaei aequalis ac socius Hecataeus Abderita in Libello *de Iudaeis* extulit? Homo enim eruditus cum Iudaeis saepe conversatus res eorum voluit cognoscere, quae magnam antiquitatis speciem prae se ferrent; cognititas magni fecit, ut debuit, dignasque censuit, quae ad notitiam Graecorum pervenirent. Is autem in Operis sui fragmento, quod Iosephus, & Eusebius servavere, sic de Urbe Hierosolymorum, eiusque Templo scribebat: *sunt autem Iudaeorum castella multa, & vici per regionem sparsi. Una autem Urbs munita, ambitu ferme L. stadiorum, quam incolunt quidem hominum circiter centum & viginti millia: istam vero Hierosolyma vocant. Illic autem, in meditullio scilicet Urbis, septum est lapideum, quinque*

que fere iugerum longitudinis, latitudinis cubitorum centum, portas habens geminas. Ibi-  
dem altare quadratum, ex impositorum &  
candidorum lapidum coagmentatione conflatum:  
cuius latera singula viginti cubitorum sunt, at-  
titudi vero duodecim. Et praeter hoc altare,  
ingens tabernaculum est, quo & ara, & ly-  
chnuchus continentur, utrumque aureum, pon-  
dus talentorum duum. Insuper autem lumen  
inextinctum dies noctesque continenter ardet.  
Nullum ibi simulacrum, donarium omnino nul-  
lum, adeoque nec planta, nec lucus, nec aliud  
quicquam huiusmodi. Sacerdotes in eo, noctu  
pariter, atque interdum assidui, certis quibus-  
dam expiationibus dant operam, quos in Tem-  
plo vinum gustare omnino nefas. Sed quid plu-  
ra? constat ex Plinio (a) Alexandrum Hieri-  
cunthe, Urbe ob palmeta celeberrima, (b)  
aliquamdiu mansisse, ut fuisset oculis re-  
giis in hortis opobalsamum spectaret, quod iis  
ex palmetis profluebat. Neque enim aliud in-  
dicare voluit Naturalis parens Historiae iis ver-  
bis *Alexandro Magno res ibi gerente toto die  
aestivo unam Concham fuisse impletam opobal-  
samo*, quam dum bellum circa ea loca gereret,

2C

---

(a) Lib. XII Hist. cap. 25.

(b) Videtur Theophrastum Lib. 9. Hist. Plant. cap. 6. &  
alios apud Relandum cap. LVII. *Palaeft. illustrat.*

ac Tyrum expugnasset processisse Hiericunthem, reique spectatorem fuisse Macedonum Regem. Nativus hic Plinii verborum sensus est, ut etiam Usserio visum, & Prideauxio (a). Distabat autem Urbs Hiericunthina a Hierosolymis stadiis circiter centum quinquaginta, hoc est Romanis milliaribus fere decem & octo; ut novum inde momentum exsurgat opinandum saltem eum accedere potuisse Hierosolyma.

XXX. Nec vero satis causae habuit idem Vandalius cur Iosephum irrideret ob insomnia quae cum Iaddo, tum Alexandro obvenisse dicit, quæque ipse, quia *nimis extraordinaria*, esse reiicienda dicitur; quasi scilicet Deus, ut revera Sacris utriusque Instrumenti Litteris erudimur, aut nunquam homines etiam a vera religione alienos de fatis sibi impendentibus eo modo docuerit, aut Reipublicae curatoribus, aliisque eximiae pietatis viris sui voluntatem, insomniis immixtis, non semel patefecerit, aut denique iure possint cuncta reiici, quae paullo rariora in Historicis occurrunt. Orientales omnes, & Iudaei potissimum insomnia sedulo observabant, nihilque apud illos antiquius fuisse videtur, quam ut eorum interpretationes sive ab aliis quaererent, sive ipsi da-

rent

---

(a) In Epistola ad Moylium An. 1718. 10. Iulii.

rent alienis . Cuius rei tam multa prostant argumenta in libris Geneseos , Levitici , Deuteronomii, aliisque, ut nihil magis certum , aut testatum sit . Credidisse Ethnicos insomnia a Diis immitteri , quae & *ὄψαις* & *ὄψματα* dicebantur , pariter exploratum ex Livio, (a) Tacito (b), atque Lactantio (c) . Quare ut receptae in populis de insomnia opinionis se conformaret Deus , non semel insomnia rerum eventus portendentia non immittebat tantum , sed & certos quosdam viros eorum explicandorum peritos excitabat : cuius rei vel sola exempla , quae de Iosepho & Daniele Sacrae Litterae suppeditant , nos certiores faciunt . Quam ob rem a veri similitudine non abhorret, Divinam Providentiam, quam iugi Hebraeorum conservationi invigilasse , eorundem ostendit ad hanc usque diem perduratio, insomnium illud Iaddo Summo apud eos Pontifici , immisisse , ut eo se erga Alexandrum modo gereret , quem describit Iosephus ; maxime quum tunc temporis non amplius Dei voluntas , ut puto , per *Urim & Thummim* innotesceret . Non debuit sane Vandalius id nimis extraordinarium , insolitumque vocare quod frequentissime vetustis temporibus, Deo aucto-

K re

---

(a) Lib. 21. cap. 22.

(b) Annal. 11. 14.

(c) *De Mors. Persecut.* cap. 30.

re contigisse, Iobi Liber testatur (a). Hinc etiam apparet non esse incredibile, visum in somnis Alexandro Iudaeorum Pontificem coindutum habitu, quem gestabat, dum eidem eunti Hierosolyma occurrit. Nam qui certissime fuerat a Numine delectus ad fatum extremum afferendum Persarum imperio, potuit etiam his signis tantae rei commoneri. Quae si ferox Vandalii ingenium respuat, non abnuerim si referre insomnium illud velit ad artem quamdam, solertiamve ipsius ducis, quem & insomnia, & oracula saepe iactitasse constat. De Tyrriorum legatis cum donis ad eundem missis haec habet Curtius (b): *Ille ut dona ab amicis accipi iussit, benigneque legatos adloquutus, Herculi, quem praecipue Tyrri colebant, sacrificare se velle dixit. Macedonum Reges credere ab illo Deo ipsos genus ducere: se vero, ut id faceret, etiam oraculo monitum.* De suscepta item ab Alexandro huius Urbis obsidione, deque difficultatibus, quas milites causabantur, disserens idem aiebat (c): *At ille nequaquam rudis tractandi militares animos, speciem sibi Herculis in somno oblatam esse pronuntiat, dextram porrigentis: illo duce, illo*  
ape-

---

(a) Vide cap. XXXIII. v. 14. & seqq.

(b) Lib. IV. cap. 2.

(c) Ibid.

*aperiente, in Urbem intrare se visum. Certe in regenda, terrendaque multitudine religionis simulatione non esse usum Alexandrum nemo dixerit. Hinc, ut unum e pluribus exemplum adducamus, quum statuisset ab Hamone rediens ad Marcotidem Paludem novam Urbem condere, de sententia postea decessit, monitum se somnio affirmans, quo Homerum imaginatus est sibi locum illi condendae ostendentem, ut refert Plutarchus. Notatu quoque digna sunt, quae habet Arrianus (a): Quod vero ad Deum generis sui originem referebat, ne hoc quidem atrox delictum fuisse censuerim; quippe qui nil aliud fortassis sibi propositum habuerit, quam ut eo figmento maiorem auctoritatem apud subditos sibi conciliaret. Sive igitur illud insomnium Alexandro revera obtigerit, sive is finxerit, perinde est; neque enim culpari Iosephus debet, qui ut Historici partes expleret, non potuit investigare curiosius an ducis calliditati tribuenda esset oratio, quam habuit ad Parmenionem, insolita regi sui in Iudaeorum Pontificem officia suspicientem. Quae autem fortia, atque grandia a militibus suis sibi polliceri non debuit Alexander, se-*

K 2

mel

---

(a) Lib. VII. *De expedit. Alexander.*

mel persuasis, quaecumque aut ageret, aut agenda iuberet, Numinum ductu & auspiciis aëtitari?

XXXI. Etsi autem, quae de infomniis a Iosepho relata sunt, non videantur fuisse a Moylio improbata; quaedam tamen alia is se eius in narratione reperisse ait, quae vix ac ne vix quidem vicis emunctioris naris adridere queant. Quis enim, inquit, approbet fuisse in Alexandri comitatu *Chaldaeos*, quos nondum vicerat? Quis item intelligat potuisse Parmenionem Regi obicere esse praeter rem, ut dum cacteri ipsam adorarent, is eadem obsequii argumenta praerberet, quum tamen tunc temporis nondum divinos sibi honores tribui imperavisset Alexander? Atqui quum Alexandri nominis terror ita orbem universum invalisset, ut cunctae gentes velut iam destinato sibi regi adularentur, non inepte quispiam dixerit, & in eius exercitu, aut comitatu *Chaldaeos* reperiri potuisse. Quod si etiam non placeat hoc nomine homines interpretari astrologiae delitissimos, cuius generis plures Alexandrum secum duxisse constat, tunc reponam in Iosephi textu; loco *χaldaίων* reponendum esse *χουδαίων* quorum plurimi Sanabelletis opera sub Alexandro militare coeperant; ut censet post Schoratum

num (a) Lloydius Episcopus Wigornienſis in epiſtola iam citata. Quod non aegre admiſerim poſt ea, quae Critici de priorum nominum aberrationibus ſatis frequentibus in libris veterum obſervavere. Parmenionis autem paraenetiſ ad (b) Orientales referenda eſt, quos in more poſitum habuiſſe Principes, alioſque virtute ac dignitate praeſtantes viros adorare, deicctoque in terram corpore revereri, nemo ignorat. Itaque id unum voluit Parmenio dicere, indecorum eſſe, ut Alexander ea venerationis cultuſque ſigna erga Iudaeos praeberet, quem caeteri, Orientales nimirum, eodem modo proſequerentur. Quid etiam ſi Graeci ipſi nonnulli id fecere, quod nondum Alexander iuſſerat?

XXXII. Copias tandem viresque Iosephi adverſarii colligunt, & aiunt nemini tam facile perſuaſum iri Dei nomen in Tiara Pontificis inſculptum ab Alexandro dignoſci, intelligique potuiſſe: eſſe prorsus incredibile peractum ab illo fuiſſe Iudaeorum Numini ſacrificium Hieroſolymis, qui deinde ad Hammonis Oraculum perrexerit, illud de ſui origine, armorumque fortuna conſulturus: viſam ab eodem fuiſſe

Da-

(a) Tom. II. Hiſt. Bibl. S. pag. 1214.

(b) Ita viſum etiam vel ipſi Ioanni Clerico Tom. XVI. P. 11. pag. 413. *Bibliothèque Ancienne & Moderne*.



Danielis Prophetiam, meram Iudaicam fabulam esse; tum vero dignum plane toti narrationi fastigium Iosephum imponere dum refert, Hierosolymitanos Iudaeos enixe Alexandrum rogasse, ut populares suos Babylone, & in Media degentes legibus quoque suis uti sineret, vorique compotes esse factos; quum tamen nondum regiones illas in sui potestatem adduxisset Alexander, & quum adduxit, nihil simile concesserit Iudaeis, Hecataeo Abderita referente hos ne verberibus quidem adigi potuisse ad ferendas auxiliatrices manus, dum Alexandri ipsius iussu Babylone Beli templum magnificentius extrueretur. Ut harum exceptionum prima refellatur, animadvertendum est cum Huetio (a) Iudaicam gentem, etsi ex instituto a reliquis gentibus discretam, ut supra quoque nos monuimus, tamen etiam temporibus, quae Alexandri aevum praecefferunt, non fuisse vicinis gentibus incognitam prorsus & incompertam (b). Nam primum, inquit doctissimus Praeful, ex ethnicis plerosque servaverunt incolumes, cum Palaestinam armis subegerunt, velut Gabaonitas, lebusaeos, aliosque complures: qua importuna clementia Divinam

ad-

---

(a) *Demonstrat. Evang.* Proposit. IV. cap. XII.

(b) Confer Hermannum Wicium in lib. III. *Aegyptiacorum* cap. XII.

adversus se iram saepe conciverunt. Unde & ab Assyriis, Moabitibus, Chanaanais, Amalecitis, Palaestinis, Aegyptiis, & Chaldaeis identidem caeli, profligati, in servitutem redacti, & extra patriam abducti sunt. Quas inter clades, & captivitates, tum Assyriacam, tum Babylonicam, & reliquiarum etiam Iudaicarum una cum Propheta Ieremia transmissionem in Aegyptum, fieri non potuit, quin Libri Sacri in Ethnicorum potestatem venirent. Praeterea Iudaeis vel propter vicinitatem aliquod etiam cum Phoenicibus commercium intercessit; David etiam & Salomoni cum Hiram; Salomoni praeterea cum Regina Chusitide, & cum Aegyptiorum Rege, cuius & filiam duxit. Quin & Sidonias fuisse uxores, & Tyrias, & Ammonitidas & Idumaeas, quarum impiis & profanis caeremoniis patrios ritus & avitam religionem inquinavit. Quo circa consociatas ab Israelitis cum impuris gentibus amicitias Deus identidem criminatur. Inde Sanchoniatonem Phoenicem libros suos Mosaicis documentis oblevi se putat. Inde nobiles illas Mercurii columnas Moysi legibus & historia fuisse notatas. Porro Phoenices disseminatis per totum Orbem coloniis, Moysi circumtulisse libros, & in varias gentes intulisse verisimillimum iudicat. Graecorum item in Aegyptum, & Aegy-

gyptiorum in Graeciam itioneserant crebrae, & diutinae mansiones iam ante Troiana tempora. Ex Aegypto venisse in Graeciam Cadmum & Herculem tradunt Herodotus (a), & Diodorus (b), Bacchica, aliaque sacra permulta ex Aegypto in Graeciam traduxisse fertur Melampus. Athenienses ipsi Aegyptiorum propagum sunt, & Saitarum colonia. Et Lacedaemoniorum leges ex Aegypto Lycurgus petivit. In Aegyptum quoque appulisse dicuntur Paris & Menelaus. Deinde vero Iosaphatum Regem Iuda, & Ochoziam Israëlitis negotiatum misisse aliquot de suis in Thraciam, vicinasque Ponti regiones perhibet Iosephus (c). Psammeticus Aegypti rex, Ionum & Carum ope in regnum restitutus, agrum illis habitandum assignavit ad ostium Pelusiacum: quo tempore Graeca primum lingua in Aegyptum est illata. Ab ostio autem Pelusiaco Memphim eos transtulit Amasis, tuendi sui causa; atque hi sedibus tandem in media Aegypto collocatis, ac praecipue Naucrati, cum reliqua Graecia creberrima commercia agitaverunt. Aegyptiorum autem narrationibus mirifice Graeci capiebantur, & quaecumque iactabat ea gens, pronis ac-

---

(a) Lib. II. cap. 43. & sequ.

(b) Lib. I.

(c) *Antiquit. Iud. Lib. VIII. cap. 1.*

accipiebant auribus, & inter suos sparsa proprios demum in usus convertebant. Quamobrem maximam Graecanicae Theologiae partem ex Aegypto profluxisse Herodotus confessus est. Graecis quoque innotuisse Mosis nomen Huetius non dubitat, & scripta, per bella Persarum tum in Asia minore gesta, tum in Graecia, quos inter militasse Hebraeos aliquos, & Hebraicis etiam rebus imbutos fuisse Persas plerosque probabile est, cum in ipso Persicae regionis meditullio etiamnum haerent Hebraei decem Tribuum, quas transfulerat Salmanasar, & per annos septuaginta in media Babylonia reliquae Tribus captivae fuissent. Cum autem in conservandis legum Sacrarum Voluminibus tantam curam adhiberent Iudaei, ut tenerentur singuli Legis exemplar vel per se, vel, si literas nescirent, per alium descriptum habere, quemadmodum tradunt Iudaeorum Magistri; qui tandem fieri potuisset, ut non eos, quibuscum assidue versabantur, studium aliquod legendarum harum scriptionum tangeret? Ita quidem evenisse scribit Philo (a), & generi humano perutile opus diu delitescere in tenebris, & intra gentis unius eiusque exiguae angustias contineri non potuisse agnoscit.

L

Id

---

(a) Lib. II. de Vita Mosis.

Id si est, ut est sane, concludit Huetius, & eas quoque ad Graecos manasse negari non potest; quorum creberrima fuere in has regiones itinera, quibus Persicam, & Aegyptiacam linguam frequenter & facile discidebant. Testis Themistocles, qui ut Persarum Regem abique interprete alloqui posset, Persicae linguae notitiam intra anni spatium comparavit. Testes Pythagoras, & Plato, qui non aliter Aegyptias disciplinas capeßere se posse censuerunt, quam si regionis huius loquelam didicissent. Tuerur etiam idem Huetius Mosaici operis partem aliquam iam ante Persici imperii excidium graeca lingua fuisse donatam. En quantis modis Alexandri aeo notum esse poterat, Iudaeorum Deum esse *Iehova*, hocque nomen in Cidari pontificia esse insculptum. Quod etiam gentibus non fuisse incognitum, ab iisque varie esse inflexum ad Bacchum, aliaque indicanda Numina exemplis iam pridem ostendere cum saepius laudatus Huetius, tum Samuel Bochartus, & alii. Ut autem singularia, quae haecenus cum Huetio attulimus, exempla non evincunt aliam fuisse Hebraeorum vivendi disciplinam ab ea, quam cum Iosepho supra monstravimus, aut potuisse vel voluisse Ethnicos eorum res perfecte exacteque cognoscere; sic ostendunt eorundem Numinis nomen, & alia eius-

eiusmodi non adeo fuisse abscondita, ut quemquam omnino laterent. Arbitror etiam Macedonum Regem, quin aliquid antea novisset, ad Dei nomen colendum, viso Iaddo, fuisse perductum ob compertam characterum plane singularium similitudinem iam pridem in somnio animadversam.

XXIII. Miror autem Iosephi pereruditos Criticos, ac censores non vidisse quam esset Alexandri moribus, religioni, institutisque consonum, ut accedens Hierosolyma cum Iudaeorum Deum coleret, tum hostiis quoque litaret; ut revera illum fecisse Iosephus tradit. Coluisse eum pro more plures Deos, eos maxime, qui *Dii praesides* loci dicebantur, opus vix est ut exemplis comprobetur. Ita pugnam ad Iosum initurus *in iugum edisi montis ascendit*, inquit Curtius [a] *multisque conluentibus facibus patrio more Diis praesidibus loci sacrificium fecit*. Devictis Getis, in ripa fluminis Iovi, Herculi, & ipsi Istro, qui transeunti propitius fuisset, Aras eum consecrasse Strabo [b] & Arrianus scribunt [c]. In mediis Hellepontis fluctibus Diis Maris Neptuno, & Nereidibus sacra fecit, teste eodem Arriano, &

L 2

de-

---

(a) Lib. III. cap. 8.

(b) Lib. 7. Geograph.

(c) Lib. 1. cap. 1. *De Expedis.*

delatus in continentem & hostilem agrum, iaculum immisit, primusque e navi prosiliens Deos precatus est, ne se Regem illae terrae invitum acciperent, ac Iovi *Descensori*, Minervae, & Herculi in loco, ubi exscenderat, altaria struxit. Minus hinc stupendum si Deum coluit Hierosolymis, peractoque sacrificio sibi propitium reddere conatus est. Licuisse eo loci etiam Gentilibus cum orare, tum holocausta spontanea, oblationes, vota que, & alia horum similia peragere, patet ex Salomonis ad Deum de Templo suo Oratione [a], & perpetuo iure, quod apud Hebraeos viguit [b]. Scimus Cyrum, Artaxersem, & plerosque alios etiam Romanorum Imperatorum insigni erga illud Templum liberalitate usos fuisse, muneribusque amplissimis ipsum decorasse. Ut vero Gentiles se ad Templum istud conferebant, ut Deum veluti simpliciter singularis Iudaici populi Numen venerarentur, quin de Unitate, aliisque ipsius attributis essent ullo modo solliciti, sic adoratum fuisse puto Deum ab Alexandro Hierosolymis; ceu qui, ut verbis utar Augustini (c), *hostias immolavit in Dei Templo, non ad eius cultum vera pietate conversus, sed impia vani-*

---

(a) III. Regum VIII.

(b) Vid. Seldenum *De iure &c.* lib. III. cap. 3.

(c) Lib. 18. *de Civit. Dei* cap. 45.

nitare cum Diis eum falsis colendum putans. Gentilium autem eiusmodi Sacrificiorum exempla, quae ii obiere Hierosolymis, cum plura supersunt, tum illud praesertim quod Iosephus narrat [a] de Vitellio, qui cum Herode Tetrarcha, atque amicis ascendit Hierosolyma, Deo, in festo Iudaeis patrio, quod instabat, sacrificaturus; ac alterum Ptolomaei Philopatoris, de quo Auctor libri III. Apocryphi Machabaeorum ita scribit [b]: Cum autem pervenisset Hierosolymam, & sacrificasset maximo Deo, & gratias reddidisset, & eorum, quae ordine sequebantur, aliquid ipso loco fecisset &c. Haec satis sunt ad persuadendum potuisse Alexandrum in Templo Hierosolymitano Deo hostias offerre, ac dein ad Hammonis Oraculum consulendum proficisci.

XXXIV. Iudaeos porro Regi Danielis Prophetiam ostendisse non miror: mirarer potius si id minime fecissent. Si quis certe velit in fastos Hebraeorum paullo attentius inquirere, secumque multos honores, ac laudes, quas sibi apud exteros comparaverunt, animo reputare, plerumque deprehendet, ut apposite animadvertit P. Simon de Magistris [c], omnem sui

no-

(a) Lib. 18. Antiquit. Iud. c. 5.

(b) Cap. 1. v. 9. & seq.

(c) In Apologia Patrum &c. adiecta Versioni Danielis LXX. pag. 396. & seq.



nominis invidiam , quam maxime gens despectissima habebat , eos aboluisse , primosque apud Reges gradus aliquando fuisse allecutos , doctrina quadam singulari , & praedictione rerum futurarum . Ipse gentis auctor Abrahamus , tum Iosephus quanti fuerint ab Aegyptiis habiti neminem latet ; illudque mirandum Divina oracula prodiderunt , quod Haebreorum constituta Republica sacri Vates maiorem alibi , quam apud suos , gratiam invenerint . Quis Rege Assyriorum potentior , quum Ionas Ninivem brevi ruituram praedicavit ? Rex tamen accepto nuntio , comminationibus unius hominis exterritus est , suisque praecepit , ut illius dicta pertimescerent . Quis Nabucho immanior , qui Sedeciam Iudaeorum Regem excaecavit , eique usum oculorum tantisper concessit , dum singulatim regia soboles , regnique procures eius in conspectu iugularentur ? Adhuc tamen is servatum Hieremiam voluit , atque inter captivos , quos plurimos ex omnibus Asiae Regnis Babylonem abduxerat , neminem aequae dilexit ac Danielelem , in quem ipse & Reges successores maxima ornamenta contulerunt . Cyrus quoque Babylonem victor ingressurus , in maximo tot gentium , quae captam Urbem incolebant , excidio ac tumultu , sedulo Hebraeorum incolumitati prospexit , quum

quumque Prophetarum oraculis successus mirifice respondere animadverteret, divinis honoribus illos est profecutus, eaque mandavit literis, ex quibus nemo dubitare iure possit, quin illi Prophetarum oracula fuerint perspecta (a): *Haec dicit Cyrus Rex Persarum: omnia regna terrae dedit mihi dominus Deus caeli, & ipse praecepit mihi, ut aedificarem ei domum in Ierusalem, quae est in Iudaea*. Nam si Dei nutu illud Edictum a se promulgari Rex ipse fatetur, profecto divina Oracula, quae id ipsum significabant, non ignoravit; nisi malit Vandalius credere illa per Angelum Cyro innotuisse. Certe ea consuetudo nunquam a Doctoribus Iudaeorum non est servata, ut si quando opus esset, divina Oracula proferrent, eaque Regibus monstrarent, ut facilius invenire possimus in ea gente nonnullos, qui Scripturarum abusu quae vellent assequerentur, quam eos qui id neglexerint, ubi aliquam apud Reges gratiam inire possent. Onias IV. inter alios perverse interpretatus Isaiam, Ptolemoeo, qui Philometor dictus est, suavit, ut in Aegypto sineret exaedificari Templum, quod Hierosolymitani instar esset: ipseque Auctor Iudaicarum Antiquitatum, quem defendimus, nun-

---

(a) Paralip. II. cap. 36. v. 23. I. Esdræ. c. 3. v. 2.

nunquam eo pervenisset, ut illas posset conscribere, nisi Vatis personam induisset. Iudaeorum ergo plane moribus consentanea Iosephus retulit, dum a suis tradidit patefactam Macedonum Regi Danielis de eodem Prophetiam. Non is adhuc finem tum rebus imposuerat suis; nondum adhuc ultimum Persis fatum adtulerat: atqui tamen tot ac tanta iam gesserat, ut eundem quivis in Danielis libro posset agnoscere, dum describit primi Graecorum Regis celeritatem incredibilem, miram fortitudinem, impetum denique vehementissimum, quo in Persas ariete praemonstratos irruit. Atque tum Iudaei ita persuasi videri voluerunt de futura latissima ipsius dominatione, totiusque Persarum imperii exterminio, ut quamvis nondum Babylone potitus esset, enixe tamen ab eodem flagitarint, ut populares suos eo loci degentes legibus suis uti sineret. Sic enim aequi rectique ratio postulat, ut Iudaeorum Hierosolymitanorum precationem excipiamus, ut si quando nempe Alexander eam Urbem suo adiecisset imperio, quod erat certissime futurum, eadem erga illos indulgentia uteretur, quam erga se ipsos Hierosolymis ostendisset. Quod se Regem facturum promississe Iosephus auctor est, cuius fidem non elewant illa Hecataei apud eun-

eundem (a): Cum aliquando apud Babylonem esset Alexander, & vellet is Beli templum quod conciderat, reponere, & omnibus militibus praecepisset humum aggerere, solos Iudaeos non opitulatos, imo & verbera & multas graves pertulisse, donec rex eis ignoscens laboris talis gratiam fecit. Quid enim, si id praeter voluntatem ac iussa Alexandri pertentatum fuit? Certe etsi Cyrus impense faveret Iudaeis, fecissetque iis potestatem extruendi Templi, Samaritani tamen tunc irritam hanc conatibus suis reddidere, sive id contigerit inscio Cyro, qui Scythico bello detinebatur, sive Aulicorum artibus, ut plerique censent. Babylonios autem id pertentasse, quod narrat Hecataeus, probabile est sive ut Iudaeorum probaretur religio, sive quod ea gens apud eos aequae ac alios contumelia Numinum insignis audires, ut aiebat Plinius (b). Sed & illud in rem nostram ex Hecataei adducto testimonio colligimus, Iudaeos scilicet sub Alexandro, ut Iosephus scribit, stipendia meruisse, quod & ex altero fusiori constat eiusdem Hecataei fragmento ex libro *de Iudaeis* a Iosepho his verbis exscripto (c):

M

Sed

---

(a) Lib. I. C. Ap. num. 22.

(b) *Histor. Nat.* Lib. XIII. cap. 3.

(c) Loc. cit. vide etiam Euseb. lib. IX. *Præparat. Evang.* cap. 2.

*Sed praeterea testis est, militasse nos cum Alexandro, & postea eius cum successoribus. Subitum illud ex iis, quibus ipse se interfuisse dicit, ab homine quodam Iudaeo gestum in expeditione. Ita enim rem narrat: „ Cum pro-*  
„ *siciscerem ad mare Rubrum una cum aliis*  
„ *equitibus Iudaeis, quos itineris duces habe-*  
„ *bamus, unus eorum aliquis comitabatur, no-*  
„ *mine Mosollamus, vir cum animi magnitu-*  
„ *dine, tum corporis robore non vulgari,*  
„ *idemque sagittarius omnium tam Graecorum,*  
„ *quam Barbarorum confessione peritissimus.*  
„ *Is igitur homo, cum universa multitudo*  
„ *iter illud agerent, & Vates quidam augurium*  
„ *captaret, peteretque ut cuncti starent, in-*  
„ *terrogavit quorsum substitissent. Cum au-*  
„ *tem Augur ei avem ostendisset, simulque*  
„ *dixisset, si quidem ibi resideret avis, omni-*  
„ *bus etiam ut eo in loco manerent expedi-*  
„ *re, sin protius volando contenderet, porro*  
„ *pergerent ipsi quoque, sin denique retro, retro*  
„ *similiter illi redirent. Iudaeus nihil contra,*  
„ *sed intento arcu iaculatur, avemque confi-*  
„ *xam peremit. Hic Augure, aliisque nonnul-*  
„ *lis graviter indignantibus, ipsique una diras*  
„ *imprecantibus, Quid, inquit, usque adeo*  
„ *furit is hac de re, infaustissimam avem in ma-*  
„ *nus fumentes? Quomodo ista, inquit, quae*

„ Vi-

„vitae ipsa suae providere non potuit, sani  
 „quicquam de suscepto a nobis itinere prae-  
 „nunciare valuit? Enimvero si praenoscere futu-  
 „rum potuisset, nunquam utique in hunc lo-  
 „cum venisset prae metu ne Mossolami Iudaei  
 „sagittis confixa moreretur. *Verum testimonio-  
 rum ex Hecataeo satis habuimus. Nam qui-  
 bus in animo est plura cognoscere, facile est ip-  
 sum librum adire.* Certe militarem fortitudi-  
 nem hac in gente summam fuisse, illud ar-  
 gumento est, quod homines exules, atque Ae-  
 gypto profugi, quos longus nimirum error, &  
 quadraginta annorum calamitas imparatos a  
 rebus omnibus in Arabum desertis attriverat,  
 Chananaeam omnem, bellicosissimis populis ha-  
 bitatam, brevi tempore subegerunt. Haec au-  
 tem Alexandrum ignorasse credibile non est; tum  
 vero inde ducem solertissimum de Iudaeis mi-  
 litibus sibi adiungendis statim cogitasse possu-  
 mus suspicari.

Excussis iam Vandalii, & Moylii exce-  
 ptionibus, ostensoque nil esse in Flaviana nar-  
 ratione, quod a veri prorsus similitudine ab-  
 ludat, imo cuncta fere cum Alexandri mori-  
 bus, institutisque Hebraeorum convenire, liceat  
 demum Exercitationi finem imponere, & qui-  
 dem iis verbis, quibus eruditissimus Ioannes  
 Freinshemius Historiam hactenus defensam in

Curtiano Supplemento sic [a] complexus est: *Tantam in periculis Alexandri fiduciam, ut ab ipsius ingenio profectam non dubito; ita frequentibus prodigiis, & ominibus auctam confirmatamque fuisse crediderim; postquam decreto Numinis clarissimis, maximisque rebus se destinari coniecit. Adhuc in Macedonia degenti species humana angustior adparuisse dicitur, monentis, ut ad evertendum imperium Persicum quamprimum in Asiam sequeretur: atque in memoriam insomnii revocatum esse Regem, quum in Phoenice res gereret; obvio Iudaeorum Sacerdote, in quo recognovit ornatum, quem pridem in obiecta imagine per quietem viderat. Nam inter obsidionem Tyri vicinis regibus, populisque deditionem, & delectus imperaverat. Sed Iudaei, qui Hierosolyma famosum Urbem tenebant, foedus cum Dario cassati, Macedonum amicitiam detrectabant. Eam gentis contumaciam puniturus, in Iudaeam infesto agmine perrexerit. At Hierosolymitani, ut Regis iram lenirent, cum uxoribus, liberisque supplices in occursum venientis effunduntur. Sacerdotes primi ibant tenuissima bysso amicti: hos deinde populus candido & ipse vestitu sequebatur. Agmen ducebat Iaddus summus Sacrorum Antistes cum*  
*so-*

---

(a) Lib. II. Cap. 11.

*solemni ornatu. Adpropinquantis pompae venustatem speciemque miratus Rex, equo desiliens solus processit, adoratoque Dei nomine, quod aureae laminae insculptum Cidaridis pontificia praeferebat, ipsum quoque reverenter salutavit. Improvisa res omnium, qui cum ea advenerant, animos in stuporem dedit. Iudaei ex propinqui exitii metu non in spem incolumitatis modo, sed inopinatae gratiae fiduciam erecti circumibant Regem, laudes, gratulationemque, & vota miscentes. Contra Syrorum Reguli, qui ob crebras acerbasque cum Iudaeis simultates Alexandrum sequuti fuerant, inimicorum suppliciiis, ut rebantur, infesti animi libidinem expleturi, stupebant; dubii verane essent quae intuerentur, an aliquod oculorum ludibrium vana imagine sopitos sensus falleret. Neque minus Macedonas insolentia spectaculi suspensos habuit: donec propius accedens Parmenion interrogare ausus est quid ita externis caeremoniis honorem deferret, quem a tam foeda gente etiam recipere vix tanto Rege dignum esset? Atque ille insomnium suum retulit. Deinde Urbem ingressus in pulcherrima aede ritu recepto sacrum Deo fecit, & dona Templo intulit. Inspexit etiam sacros gentis Codices, quibus continebantur diu ante perscripta Vaticinia. Inter quae Tyrum Macedonibus cessuram,*

&



¶ *Persas a Graeco quodam debellatum in  
clare significabatur. Eum se fore interpretatus,  
Iudaeis concessit ut domi forisque suis legibus  
ritibusque libere uterentur; & quia septimum  
quemque annum agriculturae exsortem agunt,  
etiam tributorum ista portione solverentur: Na-  
turam quoque regionis admiratus, quae aliis  
fructibus inter praestantissimas dives, Opobalsa-  
mum sola producit, Andromachum iis regionibus  
praeposuit: quem Samaritani perpetui Iu-  
daeorum hostes paulo post atrociter necaverunt.  
Sed haec quidem post Tyrum, Gazamque expu-  
gnatas gesta sunt: nos per occasionem praece-  
pimus.*

EXER-

---

---

EXERCITATIO ALTERA

D E

EIUSDEM REGI

IMPERII DIVISIONE

*AD CAPUT I. LIBRI I.*

MACHABAEORUM.

---

---



## EXERCITATIO ALTERA

DE EIUSDEM REGIS

IMPERII DIVISIONE

AD VIRUM CL.

## FRANCISCUM BERTA

REGII TAURINENSIS ATHENAEI

BIBLIOTHECAE PRAEFECTUM

**S**atis haecenus, Berta praestantissime, dictum est de Alexandri M. ingressu Hierosolyma, ut Flavium Iosephum defenderem. Nunc gravior suscipienda est disputatio, ut Scriptoris divinitus afflati auctoritas, ac fides in tuto sint, nimirum auctoris libri I. Machabaeorum, cui Protestantes, & Increduli profanos item Historicos in superiori Exercitatione laudatos opponunt, ut evincant non vera scripsisse, dum Alexandrum morti proximum Regnum suum inter praecipuos Aulae suae, militiaeque Duces divisisse retulit. Quam bene vero id exsequeretur, si tua mihi doctrina, selecta prorsus eruditio, linguarum

rum omnium Orientalium cognitio, caeteraque multa & summa ingenii ornamenta praesto essent! Quandoquidem vero, et si tanta mihi de sit rerum supellex, dicendum hac de re erat, ut & iis satisfacerem, qui hanc prae alia utiliorum disputationem iudicarent, tum vero aliquid denuo exprimerem muneri magis consentaneum; quod in Academia suslineo, nobis Exercitationem hanc meam sub alterius, quam Tui nomine vulgare, cui me, meaque studia tantum debere fateor, quantum fortasse nemini.

I. igitur Alexandrum M., antequam decederet, plurima virtute, ac militum suorum sanguine partum Imperium, praecipuis militiae Ducibus regendum tradidisse, auctor est sane locupletissimus libri I. Machabaeorum Scriptor, qui paucis sed gravissimis verbis sententiisque Regis huius gesta, ac fata complexus, sic demum ait [a]: *post haec decidit in lectum, & cognovit quia moreretur; & vocavit pueros suos nobiles, qui secum erant nutriti a iuventute, & divisit illis Regnum suum cum adhuc viveret.* Vulgatae consonat Graeca Versio, tum Syriaca. Urgent autem hunc locum, ut innui, Protestantes, cum iisque sacrorum omnium con-

---

(a) Cap. I. v. 5. & seq.

contemptores Increduli; utque iure se Machabaeos Libros a Canone Catholicae Ecclesiae excludere ostendant, profanos advocant Historicos qui post Alexandri mortem Principes Regnum inter se fuisse partitos memoriae prodiderunt; quemadmodum etiam cecinit Lucretius [a].

*Nulloque haerede relicto  
Totius fati, lacerandas praebuit Urbes.*

II. Vix tamen possent hac de re Prostantes, & Increduli nobis litem intendere, si illi paullo cautiores, aequioresque esse vellent, hi vero minus furerent; utrique autem Critices sanioris canones ac decreta sequerentur. Ecquis enimvero prudens inficiari iure queat, Machabaeorum Historico, qui & inter Macedonas vixit, & Graecis, Latinisque Historicis, quorum testimonia iactitantur, vetustior est, maiorem fidem esse habendam, etiam divina auctoritate seposita; cum gravioris ponderis sit antiquioris, monumentisque ad scribendum instructioris, scriptoris suffragium? Cur non credamus Alexandrum partitione facta Principibus, quos sibi adiunxerat, singulis singulas Imperii partes distribuisse, praestemusque hoc modo fidem maiorem Scriptori, Alexandri par-

N 2

partium non studio, & cuius nihil omnino intererat sive Rex ipse vivens de bonis, se mortuo, ad quempiam perventuris disposuisset, sive alia quacumque ratione divisum esset Imperium? Quod agnovisse videmus eos inter Protestantos, qui non adeo pertinacem, ac repugnantem veritati animum ad Machabaeorum libros perlegendos attulerunt. Ac praeter Beveregium (a), Scaligerum (b), & alios, Iacobus Usserius sectae Calvinistarum addictus, suis in Annalibus in pertexenda Syriaca, & Veteris Testamenti Historia, non solum Machabaeorum libro primo & secundo usus est, sed etiam tertio, quem nos aeque ac ille Apocryphum dicimus, tantamque hunc apud se auctoritatem obtinere pronunciavit (c), ut inde Iosephum esse corrigendum existimarit. Drusius quoque inter eosdem Protestantes eruditione notissimus dum hac de Regnorum divisione ageret, quam vivo adhuc Alexandro esse factam Scriptor Machabaicus admonet, haec ad suorum reprehensionem & documentum adiicit (d): *Ceterum iniuriam faciunt huic Scriptori, qui hinc illi calumniam struunt.* Atque ut id recte

---

(a) *Cod. Canon. Eccles. Primit.* Lib. II. cap. 9.

(b) Lib. V. *De Emendat. Temp. & Epist.* ad Drusium  
Lutherus item Praefat in Lib. II. Machab.

(c) *Ad A. M.* 3788.

(d) *Vid. Critic. Sac.* Tom. V.

Et ab se esse dictum commonstret, verba Arriani exscribit, quae nos supra latine exhibuimus  
 ἄλλοι μὲν δὲ ἄλλα ὑπὲρ Ἀ'λεξάνδρου ἀνέγραψαν, οὗδ' ἔστιν ὑπὲρ ὅτου πλείονες, ἢ ἀξιοφρονήτεροι ἐς ἀλλήλους. Denique Albericus Gentilis, Calvinianarum partium Iurisconsultus eruditus cui multum debere Grotium dicunt, quamquam satis acer alias Catholicorum insectator, in disputatione ad Librum I. Machabaeorum (a), inscripta Tobiae Matthaeo Episcopo Dunelmensi, licet eundem librum esse Canonicum perneget, seque abfuturum semper quamlongissimea Pontificiis profiteatur, attamen multa, quae Theologi, ut inquit ipse, sui contra illius dignitatem disputabant, infirmiora iudicat, reque ipsa discutit, monetque suos, ne, quum Pontificios oppugnare volunt, eas argutias consectentur, quibus efficient, ut infirmi etiam de Canonicis libris male sentiant, quos vident per easdem subtilitates peti posse. Vult etiam, nec immerito, Machabaicos libros, *qui titulis amplissimis laudari a Patribus consueverunt, non debere manu profana de ea possessione deiici, quam nacti tandem in Ecclesia erant, & in qua paullo ante (nempe ante Lutheri turbas) degebant; huiusque rei causam reddens*

---

(a) Tom. V. Critic. Sac. r.



*praecipue sequor*) Ptolemaeus Lagi, & Aristobulus. Sic Historici, qui Machabaeorum libri Scriptori obiiiciuntur, distributionem aliquam Provinciarum ab Alexandro, iam iam e vivis excessuro, factam umittere potuerunt; maxime quum is non summo cum iure Provincias Alexandri Ducibus fuisse distributas dixerit, ut post pauca declarabimus.

III. Atque id eo confidentius dicimus, quod auctores quoque illi sententiae haud desint, quae asseverat scriptum fuisse ab Alexandro Testamentum, quo post eius mortem referato, fieri divisio ex suprema eius voluntate poterat. Nam Scriptor Machabaicus non docet disertissime postrema Alexandri vota, ac iussa vim suam obtinuisse. Certe Diodorus Siculus testatur [a] Alexandrum Testamentum toto de Imperio Rhodi deposuisse: *Alexander sane, quorum memoria celebratur, omnium potentissimus, hanc Urbem prae caeteris coluerat maxime, ita quidem ut Testamentum de toto Regno illic deponeret. Qui Diodorum Siculum hanc narrationem ex vulgi rumusculis, aut militum gregariorum fabulis confarcinasse autumant, ne inde Libri Machabaici Scriptori maior accedat auctoritas, ii secum primo repu-*

---

(a) Lib. XX. cap. 81.

postrema Alexandri vota, ac Tabulae quavis ex parte vulgo innotescerent. Nam quum sit vero proximum, ut dicemus, illos Duces ab Alexandro, vel a Perdicca ex eius voluntate non uti Reges, sed ceu Satrapas confirmatos in Provinciis fuisse, quibus praeerant; cumque ii praeterea dure Populos regerent, verendum certe ipsis erat, ne hi iam pertacti tyrannicae dominationis iugum excuterent, maxime ubi nullum iis ius inesse regnandi cum summa potestate didicissent. Diodoro autem Siculo scriptum ab Alexandro Testamentum referenti consentit Ammianus Marcellinus [a] his verbis: *Deinde cum Daraeus, posteaque Xerxes Graeciam elementorum usu mutato aggressi, cunctis paene copiis terra, marique consumptis, vix ipsi tutum invenere discessum: ut bella praetereamus Alexandri, & testamento nationem omnem in successoris unius iura translatam.* Auditor etiam V. saeculi in *Historia Armenia* a Wisthonio edita [b] eiusdem rei fidem facit inquiring: *Igitur Alexander ille Macedo . . . totius orbis imperio potitus, cum regnum suum inter plures partitus est, ita tamen ut Macedonum Imperium generatim univarseque appelleretur, ipse a vita excessit.* Denique praeter

O

Ma-

---

(a) Lib. XXIII. cap. 6.

(b) Lib. II. cap. 1. pag. 82. & seq.

Malalam [a], eadem scribit Auctor *Excerptorum Chronologicorum* a Scaligero editorum in hanc sententiam: *Veniens ad mortem Alexander, testamentum scripsit, ut unusquisque Principum Alexandri regnarent singuli in proprias eorum provincias*. Cuius partitionis, testamento factae, memoriam diu apud Orientales, Iudaeosque perdurasse, ex Herbelotii *Bibliotheca Orientali* [b] & Gorionide constat. Quod si Iustinum, [c] & Aemilium [d] Probum attente perlegeris, sin minus Testamentum, certe distributionem Provinciarum aliquam, eorumque designationem, qui post se essent regnaturi, fuisse a Rege Macedonum factam intelliges.

IV. Idem dico de Graecorum, Latinorumque Historicorum narrationibus, quae tamen abutuntur osiores Machabaici Scriptoris. Sic enim postremas Alexandri voces, ac facta Diodorus [e] recitat: *Tandem malo subinde magis exasperato, cruciatibus gravissimis correptus, spem vitae deponit, detractumque digito anulum Perdiccae tradit. Ibi cum his verbis amici percunctarentur: cuinam imperium relin-*  
quis?

---

(a) Chronic. pag. 72.

(b) Pag. 318.

(c) Lib. XVI. c. 19.

(d) In *Eumene*.

(e) Lib. XVII. num. 117.

quis? Praestantissimo respondit. Et quum novissimam emisit vocem adiecit, a primoribus amicorum, ingenti sibi certamine parentatum iri; & rursus (a): Hic Babylone vitam cum morte commutans, dum sub extremum vitae habitum a familiaribus interrogatur, cui Regnum post se relictum erat? optimo, respondet; ingenti enim certamine amicos mihi parentaturos praevideo. Id quod verissime sic evenit. Nam amicorum nobilissimi, de principatu disceptantes, multa post Alexandri obitum bella & certamina maxima inter se excitarunt. Non absimilia narrat Arrianus (b): sunt qui hoc etiam addant, interrogatum ab amicis, cuinam regnum reliqueres, respondisse, Optimo. Alii adiecisse eum ad haec verba aiunt, cernere se ingens certamen funebre post suam mortem futurum. Graecis Historicis consona Latini prodiderunt; nam Curtius aiebat (c): propiusque adire infestis amicis, nam & vox deficere iam coeperat, detractum digito anulum Perdiccae tradidit, adiectis mandatis, ut corpus suum ad Hammonem ferri iuberet. Quaerentibus his cui relinqueret Regnum, respondit ei, qui esset optimus. Caeterum providere iam ob id certamen,

O 2

ma-

(a) Lib. XVIII. n. 1.

(b) De Expedis. lib. VII. c. 26.

(c) Lib. X. cap. 5.

*maguos funebres ludos parari sibi. Quorum sunt similia, quae habet Iustinus [a]: Dimissis militibus amicos circumstantes percontatur videanturue sibi similem reperturi Regem? Tacentibus cunctis, tum ipse, ut hoc nesciat, ita illud scire, vaticinariue se ac pene oculis videre dixit, quantum sit in hoc certamine sanguinis fusura Macedonia: quantis caedibus, quo crure mortuo sibi parentatura. Ad postremum corpus suum in Hammonis Templo coudi iubet. Cum deficere eum amici viderent, quaerunt quem imperii faciat haeredem. Respondit, dignissimum. Tanta illi magnitudo animi fuit, ut cum Herculem filium, cum fratrem Aridaeum, cum Roxanem uxorem praegnantem relinqueret, oblitus necessitudinum dignissimum nuncuparet haeredem. Prorsus quasi nefas esset viro forti alium quam virum fortem succedere, aut tanti regni opes aliis, quam probatis relinquere. Hac voce veluti bellicum inter Amicos cecinisset, aut malum discordiae misisset, ita omnes in aemulationem consurgunt: & ambitione vulgi tacitum favorem militum quaerunt. Sexto die praeclusa voce exemptum digito annulum Perdiccae tradidit: quae res gliscentem amicorum dissensionem sedavit. Nam etsi non voce nun-*

cu-

---

(a) Lib. XII. cap. 15.

*cupatus haeres, iudicio tamen electus esse videbatur.* In his, inquam, narrationibus Machabaei Scriptoris adversarii plura coguntur agnoscere, quae illius fidem tueantur. Ipsa illa postremarum una Alexandri vox, ut animadvertit doctissimus Erasmus Froëlichius [a], *dignissimum, seu fortissimum & optimum* successorem se velle, satis innuebat, eundem cuique pro meritis, ac dignitate consultum voluisse; neque erat certe praestantissimorum Ducum quicumque qui se aliqua Imperii parte dignissimum, & aequae fortem atque alios non crederet. Apparet etiam Alexandrum *tradito Perdiccae anulo* potestatem ei Imperii dividendi fecisse. Quod etsi Perdiccas diviserit Rege vita functo, merito adhuc sacer Historicus prodidit, ipso vivo pueros ex divisione Regnum habuisse. Nam propter potestatem dividendi Imperii in Perdiccam conlatam, haereditas illa ad Alexandri pueros pervenit; perinde ergo est, ac si Rex ipse vivens futuris rebus providisset, singulisque divisisset, quae bello acquisierat. Neque ob id solum, verum etiam priusquam Rex migraret e vita, Principes Amicos suos Provinciis praefecerat, iisque administrandas concesserat, declarans quid quemque habere in pos-

---

(a) Cap. VI. Prolegomen. ad *Annal. Regum & Rerum Syriae.*

sterum vellet : regiam in ea decernenda administratione voluntatem secutus Perdiccas eos Principes in earum provinciarum regimine confirmavit , quas olim Alexandri iussu procurabant . Qua in re quum id re praestitum sit , quod antea Rex constituerat , recte visum est non tam Perdiccae consilio , quam libera Regis dispositione pueros in Alexandri bona , eo quo diximus modo , successisse . Etsi igitur Alexandrum ipsummet per se in pueros Regnum non esse partitum quispiam contendat , mendacem tamen inde fuisse libri Machabaeorum Auctorem non consequitur , aut probatis rerum Alexandri Scriptoribus contrarium ; maxime quum id Dexippus his verbis satis (a) innuerit ὅτε Περδίκκας μετὰ τὴν Ἀλεξάνδρου τελευτὴν τὰς ἀρχὰς ἐνεῖμεν . Quae omnia non elewantur scrupulis quibusdam , quos iniicere studuit Gottliebicus Wernsdorffius [b] ; Alexandrum scilicet ingressis Ducibus iam vocem amisisse ; tum Machabaici Scriptoris narrationem *cum tota facie illarum rerum ac serie historiarum non cohaerere ; cum enim moreretur Alexander nullus Ducum vel somnio de dividendo Imperio cogitaverat* . Ut enim observat vindex Anonymus cum Aucto-  
ri-

---

(a) Apud Phot. cod. 82.

(b) *Commentatio Hist. Critica de fide Hist. librorum Machab.*  
in qua Froelichii Annales Syriae expenduntur. Wratislaviae 173

ritatis librorum Machabaeorum, tum praestantiae Annalium Regum Syriae Froëlichii (a), potuit Alexander quamquam & duros tradito Perdiccae Annulo Regnum partiri. Quis etiam credat & φω 12v ex febris tamdiu perdurasse, ut trium dierum intervallo nunquam vel aliquantulum Rex levatus fuerit? Facile etiam quisque credet Duces prope tentorium iugiter constitisse, ut ubi vocem aliquam posset emitte, illico praesto essent supremis Regis morituri mandatis excipiendis. Iam quod ille Lutheranus Criticus adiicit Ducum neminem tum temporis de dividendo occupandove regno cogitasse unumque successoris Alexandri nomen scire cupiisse, cum iis omnibus pugnat Historicis, quorum testimonia modo adduximus. Quam enim Ducum concordiam ille sibi fingit, quando vel Rex ipse iam iam excessurus noverat, ac pene oculis se videre dixerat, *quantum in hoc certamine sanguinis fusura esset Macedonia, quantis coedibus, quo cruore mortuo sibi parentatura?* An non gliscens Amicorum dissensio, quam traditione annuli Perdiccae sedatam fuisse Iustinus idem scribit, satis indicat, qua ratione illi essent affecti? An non Aemilius Probus,

Cor-

---

(a) Auctoritas Librorum Machabaeorum Adserta, & Froëlichiani Annales Syriae Defensi &c. Viennae Austriae 1749.



Cornelius Nepos de iisdem enarrat [a]: *post huius occasum statim regium ornatum, nomenque sumpserunt: neque quod initio praedixerunt, se Alexandri liberis regnum servare, id praestare voluerunt; & uno propugnatore [Eumene] sublato, quid sentirent aperuerunt?* Denique Arrianus post exscripta verba hoc Epilogo postremi Alexandri morbi relationem absolvit: πολλὰ δὲ κ, ἄλλα οἷα ἀναγεγραμμένα ὑπὲρ τῆς Ἀλεξάνδρου τελευτῆς. *Multa vero alia etiam novi de Alexandri morte scripta esse (b):* ut id nimirum tantum valeat quam Machabaeorum Historici narratio; nam inter illa πολλὰ ἄλλα haud dubie aut Testamentum, aut alio modo facta ab Alexandro Provinciarum partitio cenferi potest, uti etiam ex aliis Gracis, Latinisque Scriptoribus ostendimus. Quod si Scriptor Machabaicus expresse conditi ab Alexandro Testamenti non meminit, id aequa eius narrationem abiicendi causa esse non potest. Quis enim unquam in scriptore ἐν παρόδῳ aliquid narrante, quis sacro in Historico eam circa res profanas & exteras ἀκριβολογίαν desideravit unquam?

V. Non obscure tamen indicavit iis verbis & *divisit illis Regnum suum* nil aliud voluisse innuere, quam Regni totidem in Satrapias di-

---

(a) In *Eumene*.

(b) De *Expedit.* Lib. VII. c. 27.

divisionem. Id scilicet quae mox adiecit ostendunt (a): & obtinuerunt pueri eius regnum unusquisque in loco suo. Et imposuerunt omnes sibi diademata post mortem eius, & filii eorum post eos annis multis, & multiplicata sunt mala in terra. Quae significant Alexandri pueros postea quam sese in Provinciis confirmassent, quibus fuerant praefecti, tum vero etiam fatis cessissent, qui ius habebant ad Imperium, tandem regiam usurpasse auctoritatem, regumque personam induisse, quod nemo antea fuerat ausus, teste praeter alios Iustino his verbis (b): *Huius honoris ornamentis tamdiu omnes abstinnerunt, quamdiu filii regis sui supereffe potuerunt. Tanta in illis verecundia fuit, ut cum opes regias haberent, regum tamen nominibus aequo animo caruerint, quoad Alexandro iustus haeres fuit*. Quod licet anno vigesimo dumtaxat ab excessu Alexandri ex parte completum sit, ut ostendit Nicolaus Freret in Dissertatione de Aera Seleucidarum (c), non evertit tamen quae heic constituimus; nam Scriptor Machabaeus, qui sibi paucissimis res Alexandri complecti proposuerat, non potuit temporis illud

P in-

(a) V. p. 10.

(b) Lib. XV. c. 11.

(c) Vide Tomo XVI. part. 286. Mem. de l'Acad. des Inscriptions &amp;c.

intervallum, nisi ut minimum spectare, tum vero etiam debuit facta intermedia prorsus praeterire. Videtur autem hanc firmare interpretationem Graecus Textus, qui ita se habet *καὶ ἐπεκράτησαν οἱ παῖδες αὐτοῦ ἕκαστος ἐν τῷ τόπῳ αὐτοῦ, καὶ ἐτέθηεντο πάντες κ. τ. λ.* Quibus violenta veluti Alexandri puerorum agendi ratio praemonstratur, ut ex Praefectis, ac Satrapis Reges evaderent. Atque ob id forte in Versione Theodotionaeae libri Danielis [a] Alexandri Regnum veluti adhuc stans ac perdurans eius post mortem dicitur *καὶ ὡς ἂν στήῃ ἡ βασιλεία αὐτοῦ συντριβήσεται* & *regnum eius adhuc stans conteretur*; quam versionem male septuaginta Senum esse credidit Gallus Anonymus toties in altera Exercitatione citatus; nam ii, si tamen unquam Danielis librum graece reddidere, ita in Versione sua habent, nuper e Codice Chisiano vulgata a viro doctissimo P. Simone de Magistris *καὶ ἐν τῷ ἀναστήναι αὐτὸν συντριβήσεται κ. τ. λ.* *Et cum exaltatus fuerit ipse, conteretur Regnum eius, & dividetur in quatuor ventos caeli.* Vulgata vero nostra: *& cum steterit conteretur Regnum eius, & dividetur in quatuor ventos caeli.* His omnibus praedictum est Imperium Alexandri post eius fata dividendum fore, ac plane

---

(a) Cap. XI. 4.

plane lacerandum . Non solum enim in quatuor Monarchias discidium est , ut vaticinatus fuerat Daniel , cui constitutum erat eos praesertim (a) Alexandri successores indicare , qui proxime ab eius obitu regno potiti , caeterorum praestantissimi , & veluti principes habebantur ; sed in plura alia regna ; quum nempe Satrapae longe ab his disliti , horum exempla secuti , Macedonum iugum a suis cervicibus , excussere , testibus Arriano , Diodoro Siculo , Dexippo , & Iustino , qui ait (b) : *Eodem tempore etiam Theodotus mille urbium Bactrianarum praefectus defecit , regemque se appellari iussit : quod exemplum secuti totius Orientis populi a Macedonibus defecere* . Scilicet verisimile admodum est Alexandrum postremis Tabulis , quas cum condidisse diximus , cavisse ut in partitione Regni suorum cum primis haberetur ratio , quando pares fuissent imperio , dum hoc interea selectis ab se ducibus , praefectisque regeretur . Quod sane ab iis Historicis indicatum videas , qui dissensiones eius post obitum excitatas enarravere : vix enim tanta cum Aridaei eius fratris , tum filii ex Barsine nati , alteriusve , quem Roxane esset paritura , ratio habita fuisset , nisi is aut scripto

P 2

Te-

---

(a) Legatur S. Hieronymus ad Cap. XI. Danielis .

(b) Lib. XLI. cap. IV.

Testamento, aut annuli Perdiccae traditione aliquid hac de re providisset. Hisce autem ex Satrapis, quos regnum usurpasse Sacer Auctor indicat, ii Reges exorti sunt, de quibus, ut alios praeteream, ita Appianus disserit (a): *Antigonus in Ptolemaeum irritator, circa Cyprum vicit eum egregie navali praelio, ductu Detrii filii: ob quam victoriam exercitus Reges appellavit tum patrem, tum filium, extinctis iam Regibus Arididae Philippi filio, & Olympiade, atque Alexandri filiis: ac mox etiam Ptolemaeum Regem appellavit suus exercitus, ne propter cladem videretur victori cedere: atque ita disparem casum par eventus secutus est. Id exemplum statim imitati reliqui subito e Satrapis Reges exorti sunt. Eadem colligas ex Arriano, Diodoro, Plutarcho, & aliis, quorum sunt obvia testimonia. His autem etiam constet Duces ipsosmet Alexandri Regnum inter se esse partitos, inepte prorsus abutuntur Protestantes ad Machabaici Scriptoris fidem elevandam, quum nemo nesciat illos Satrapas, quorum erat amplissima potestas, quibusvis Alexandri Tabulis, numero & favore militum quemvis obicem ponere potuisse.*

XVI. Valent autem dicta hactenus ad alterum

---

(a) *De Bell. Syriac. pag. 122.*

terum telum confringendum, quod iidem homines in eundem scriptorem intorquent, ut ipsum rerum Alexandri inscium valde fuisse persuadeant. Ea scilicet carpunt: & *imposuerunt omnes sibi diademata post mortem eius*, quod quidem non nisi post annos aliquot contigit, ut nos etiam monuimus, nec ab omnibus eodem tempore esse factum, constat. Addunt narrari etiam [a] Alexandrum primum regnasse in Graecia, quod esse falsum, nullaque posse ratione defendi aiunt, quum sit exploratum multos reges Lacedaemoniorum, Macedonum, Corinthiorum, Atheniensium praecessisse Alexandri tempora. Sed his non minuitur Sacri Scriptoris auctoritas. Nulibi is insinuavit *statim* Alexandri Duces sibi diademata imposuisse: nec vero debuit aut bella percellere, quae id facinus praecesserunt, aut ordinem, ac tempora distincte notare, quibus Alexandri Imperium divisum fuit. Nihil aliud hoc in loco, ut optime admonuit Froëlichianorum Annalium Vindex [b], Sacer Historicus nobis constare voluit, quam quod ad implendas Prophetias, & ad nexum sequentium rerum sufficeret. Hac de causa rerum maximarum revolutiones brevissime designavit. Nec sane video, quomodo ab Historico haec *in va-*

166a

(a) Cap. I. v. 1.

(b) Lib. cit. pag. 179.

πίδα. & συνθέμεν enarrante, melius id scribi potuerit. Praeclare simili in caussa Hieronymus (a) Daniele explanans: *notandum quod quatuor post Cyrum Regibus Persarum enumeratis, novem praeterierit, & transierit ad Alexandrum. Non enim curae fuit spiritui prophetali historiae ordinem sequi, sed praeclara quaeque perstringere.* Altera demum animadversio nec errorem, nec ἀκυρολογίαν Scriptoris Machabaici demonstrat, fuitque dudum ab Interpretibus (b) doctissimis refutata, quorum responsiones huiusmodi sunt: Regnavit primus in Graecia Alexander totius Asiae princeps & Monarcha: primus ex Graecis, qui imperii fines adeo dilataverit: primus qui Graecorum nomen illustre reddiderit paucis antea cognitum: primus qui potentissimos Reges tanta clade affecerit, ut ipsi nullum deinceps adhiberi remedium potuerit; qui splendidissima regna adeo extinxerit, ut nulla spes superesset fore, ut rursus illucent: primus denique qui totam Graeciam occupaverit olim inter plures reges distributam, Graecamque Monarchiam, eversa Persarum, constituerit. Neque aberrant a vero, qui putant

---

(a) Loco cit.

(b) Vid. praefectum sup. cit. Opus. *Auctoritas libror. Machab. &c.* pag. 173. Calmetum, & Marchinium *De Divinit. Sac. Bibl.* P. II. Art. XXIII.

tant Sacrum Scriptorem Graeciae nomine pref-  
 fatus Syriam, & Aegyptum nuncupasse, quae  
 post Alexandrum Macedonem a suis, at-  
 que a populis suae ditioni adiectis *Graecorum*  
*regnum vocabatur*. Atque haec una est eius  
 loci interpretatio si legatur, ut exemplaria  
 Graeca plerumque habent Αλέξανδρος ἐπάταξε  
 τὸν Δαρεῖον τὸν βασιλέα Περσῶν, καὶ Μήδων, καὶ ἔβα-  
 σίλευσεν ἀντὶ τοῦ πρώτου ἐπὶ τὴν Ἑλλάδα. *Alexander*  
*percussit Darium Regem Persarum, ac Medo-*  
*rum, atque eius loco primus Graeciae impe-*  
*ravit*. Quis enim non animadvertat Graeciam  
 hic pro Asia sumi debere? Noluisse vero Scri-  
 ptorem Machabaicum dicere Alexandrum pri-  
 mum ex Graecis fuisse regia potestate praedi-  
 tum res ipsa loquitur, quum e Macedonia e-  
 gressum dicat, tanquam ex Provincia, in qua  
 summa auctoritate dominabatur, ut ditionem  
 amplificaret. Vulgata nostra omittit illud  
 ἀντὶ τοῦ, quamvis tamen sensum satis perspi-  
 cue reddat. Has plerumque probatas responsio-  
 nes commodè adhibemus, praeter illam, quam  
 supra indicavimus, scilicet secundum lectionem  
 alteram Graeca verba Πρώτον (ut habet Ms.  
 Alexandrinum, & Syrus interpres) ἐβασίλευσε,  
 vertenda esse *primum regnavit*, id est prius-  
 quam toti Asiae dominaretur, iam in Graecia  
 regnaverat. Caetera quae opponuntur eidem sa-  
 cro



cro Historico ut ad institutum nostrum minime spectantia, praetermittimus, hoc unum monuisse contenti ex obscuris multis rebus, quae aut non sine difficultate exponi, aut vix cum aliis Historicis conciliari posse videntur, non licere eiusdem Divinae auctoritatem in dubitationem adducere, nisi idem fatum aliis etiam utriusque Testamenti libris intentetur, quos tamen Protestantes Divinos esse non dubitant

F I N I S.